

宋

史

三三三

蘇子瞻
宋史
PDG

志卷第七十五

宋史一百二十二

開府儀同三司柱國魯國軍器中書丞相齊國鎮經筵事都總裁臣脫脫等奉

敕修

禮二十五

凶禮一

山陵

山陵謚祔服紀葬儀與士庶之喪制為凶禮其上陵忌日漢儀如吉祭宋制是日禁屠殺設素饌輟樂舉哭素服行事因以類附焉太祖建國號僖祖曰欽陵順祖曰康陵翼祖曰定陵宣祖曰安陵安陵在京城東南隅乾德初改卜河南府鞏縣西南四十里訾鄉鄧封村以司徒范質為改

上安陵使學士竇儼禮儀使中丞劉溫叟儀仗使樞密直
學士薛居正鹵簿使太宗時尹開封爲橋道頓遞使質尋
免相以太宗兼轄五使事修奉新陵皇堂下深五十七尺
高三十九尺陵臺三層正方下層每面長九十尺南神門
至乳臺乳臺至鵲臺皆九十五步乳臺高二十五尺鵲臺
增四尺神墻高九尺五寸環四百六十步各置神門角闕
有司言改上陵寢宣祖合用哀冊及文班官各撰歌辭二
首吉仗用大駕鹵簿凶仗用大升輿龍輜鵝葺纛魂車香
輿銘旌哀謚冊寶車方相買道車白幘弩素信幡錢山輿
黃白紙帳暖帳夏帳千味臺盤衣輿拂纛明器輿漆梓宮

夷衾儀樽素髮包牲倉瓶五穀輿瓷甒瓦甒辟惡車進玄
官有鐵帳覆梓官藉以椽櫚褥鐵盆鐵山用然漆燈宣祖
袞冕昭憲皇后花釵罩衣贈玉十二神當壙當野祖明祖
思地軸及留陵刻漏等並制如儀有司又言按儀禮改葬
總注云臣爲君子爲父妻爲夫也必服總者親見尸柩不
可以無服總三月而除之又五禮精義云改葬無祖奠蓋
祖奠設於柩車之前以爲行始至於改葬告遷而已今請
皇帝服總皇親及文武官護送靈駕者亦服總旣葬而除
不設祖奠止於陵所行一虞之祭宣祖謚冊謚寶舊藏廟
室合遷置陵內改葬之禮與始葬同凡筵宜新明器壞者

改作凡歛衣歛物並易之其皇堂贈玉鎮圭劔佩旒冕玉寶並以珉玉藥玉綬以青錦安陵中玉圭佩劔玉寶等皆用于闡王孝明孝惠陵內用珉玉藥玉啓故安陵奉安宣祖昭憲孝惠二后梓宮于幄殿靈駕發引所過州府縣鎮長吏令佐素服出城奉迎并辭皆哭自發引至揜皇堂皆廢朝禁京城音樂順祖翼祖皆葬幽州至眞宗始命營奉二陵遂以一品禮葬河南縣制度比安陵減五分之一石作減三分之一尋改上定陵名曰靖陵

開寶九年十月二十日太祖崩遺詔以日易月皇帝三日而聽政十三日小祥二十七日大祥諸道節度防禦團練

使刺史知州等不得輒離任赴闕諸州軍府臨三日釋服
群臣叙班殿庭宰臣宣制發哀畢太宗即位號哭見群臣
群臣稱賀復奉慰盡哀而退禮官言群臣當服布斜巾四
脚直領布襴腰經命婦布帕首裙帔皇弟皇子文武二品
以上加布冠斜巾帽首經大袖裙袴竹杖士民縞素婦人
素纓諸軍就屯營三日哭群臣屢請聽政始御長春殿群
臣喪服就列帝去杖經服斜巾垂帽卷簾視事小祥改布
服四脚直領布襴腰經布袴二品以上官亦如之大祥帝
服素紗軟脚折上巾淺黃衫緞皮鞋黑銀帶群臣及軍校
以上皆本色慘服鐵帶鞞笏諸王入內服衰出則服慘又

成服後群臣朝晡臨三日大小祥禫除朔望皆入臨奉慰
內出遺留物頒賜諸臣親王遣使賞賜方鎮二十七日命
宰臣撰陵名哀冊文明年三月十七日群臣奉謚號冊寶
告于南郊明日讀于靈坐前四月十日啓櫛宮帝與群臣
皆服如初喪朝晡臨殿中退易常服出宮城十三日發引
帝衰服啓奠哭群臣入臨升梓宮于龍輜祖奠徹設次明
德門外行遣奠禮讀哀冊帝哭盡哀再拜辭釋衰還宮百
官辭於都城外二十五日掩皇堂二十九日虞主至奉安
于大明殿五月十九日祔廟之第五室以孝明皇后王氏
升配禮畢群臣奉慰其吉凶仗如安陵惟增輜輦車神帛

肩輿鹵簿三千五百三十九人陵在鞏縣祔宣祖曰永昌
至道三年三月二十九日太宗崩于萬歲殿真宗散髮號
擗奉遺詔即位於殿之東楹制永熙陵皇堂深百尺方廣
八十尺陵臺方二百五十尺大駕鹵簿用玉輅一革車五
外凡用九千四百六十八人有司定散髮之禮皇帝皇后
諸王公主縣主諸王夫人六宮內人並左被髮皇太后全
被髮帝服布斜巾四脚大袖裙袴帽竹杖腰經首經直領
布襪衫白綾襯服諸王皇親以下如之加布頭冠綃襯服
皇太后皇后內外命婦布裙衫帔帕頭首經綃襯服宮人
無帔文武二品以上布斜巾四脚頭冠大袖襪衫裙袴腰

經竹杖絹襯服自餘百官並布幘頭襪衫腰經省五品御
史臺尚書省四品諸司三品以上見任前任防禦團練刺
史內客省閣門入內都知押班等布頭冠幘頭大袖襪衫
裙袴腰經諸軍庶民白衫紙帽婦人素縵不花釵三日哭
而止山陵前朔望不視事六月詔翰林寫先帝常服及絳
紗袍通天冠御容二奉帳坐列于大升輿之前仍以太宗
玩好弓劍筆硯琴碁之屬蒙組繡置輿中陳於仗內十月
三日靈駕發引其凶仗法物擎舁牽駕兵士力士凡用萬
一千一百九十三人挽郎服白練寬衫練裙勒帛繪幘餘
並如昌陵制十一月二日有司奉神主至太廟近臣題謚

號祔於第六室以懿德皇后符氏升配置衛士五百人于陵所作殿以安御容朝暮上食四時致祭焉

乾興元年二月十九日真宗崩仁宗即位二十日禮儀院言準禮例差官奏告天地社稷太廟諸陵應祠祭惟天地社稷五方帝諸大祠宗廟及諸中小祠並權停俟祔廟禮畢仍舊是日命閣門使薛貽廓告哀于契丹宣慶使韓守英爲大內都巡檢內侍分領宮殿門衛士屯護閣門使王遵度爲皇城四面巡檢新舊城巡檢各權添差益以禁兵器仗城門亦設器甲以辨姦詐二十一日群臣入臨見帝于東序閣門使宣口敕曰先皇帝奄棄萬國凡在臣僚畢

同號慕及中外將校並加存撫群臣拜舞稱萬歲復哭盡
哀退是日上表請聽政凡三上始允二十三日陳先帝服
玩及珠襦玉匣含椁應入梓宮之物於延慶殿召輔臣通
觀明日大斂成服二十五日有司設御坐垂簾崇政殿之
西無簾幕皆縞素群臣叙班殿門外帝衰服杖經侍臣扶
升坐通事舍人引群臣入殿庭西向合班俟簾捲群臣再
拜班首奏聖躬萬福隨班三呼萬歲退宰臣升殿奏事如
儀三月一日小祥帝行奠釋衰服群臣入臨退赴內東門
進名奉慰自是每七日皆臨至四十九日止十三日大祥
帝釋服服慘十四日司天監言山陵斬草用四月一日丙

時吉十六日山陵按行使藍繼宗言據司天監定永安縣東北六里曰卧龍岡堪充山陵詔雷允恭覆按以聞皇堂之制深八十一尺方百四十尺制陵名曰永定九月十一日召輔臣赴會慶殿觀入皇堂物皆生平服御玩好之具帝與輔臣議及天書皆先帝尊道膺受靈貺殊尤之瑞屬于元聖不可留于人間宜於永定陵奉安二十三日奉導天書至長春殿帝上香再拜奉辭二十四日天書先發帝啓奠梓宮讀哀冊禮畢具吉凶儀仗百官素服赴順天門外至板橋立班奉辭還詣西上閣門進名奉慰十月十三日掩皇堂十八日虞主至京十九日群臣詣會慶殿行九

虞祭二十三日祔太廟第七室

嘉祐八年三月晦日仁宗崩英宗立喪服制度及修奉永昭陵並用定陵故事發諸路卒四萬六千七百人治之宣慶使石全彬提舉制梓宮畫樣以進命務堅完毋過華飾三司請內藏錢百五十萬貫綃絹二百五十萬匹銀五十萬兩助山陵及賞賚遣使告哀遼夏及賜遺留物又遣使告諭諸路又以聽政奠告大行近臣告升遐於天地社稷宗廟宮觀又告嗣位賜兩府宗室近臣遺留物五月翰林學士王珪言天子之謚當集中書門下御史臺五品以上尚書省四品以上諸司三品以上於南郊告天議定然後

連奏近制唯詞臣撰議即降詔命庶僚不得參聞頗違稱天之義臣擬上先帝尊謚望詔有司稽詳舊典先之郊而後下臣之議七月宰臣以下宿尚書省宗室團練使以上宿都亭驛請謚于南郊八月告于福寧殿天地宗社宮觀九月二十八日啓菴宮以初喪服日一臨易常服出十月六日靈駕發引天子啓奠梓宮升龍輜祖奠徹與皇太后步出宣德門群臣辭于板橋十五日奉安梓宮陵側十七日開皇堂十一月二日虞主至皇太后奠于瓊林苑天子步出集英門奉迎奠于幄七日祭虞主二十九日祔太廟主如漢制不題謚號及終虞而行卒哭之祭禮院言故事

大祥變除服制以三月二十九日祥至五月二十九日禫
六月二十九日禫除至七月一日從吉已蒙降敕謹按禮
學王肅以二十五日爲畢喪而鄭康成以二十七月通典
用其說又加至二十七月終則是二十八月畢喪而二十
九月始吉蓋失之也天聖中更定五服年月敕斷以二十
七月今士庶所同遵用夫三年之喪自天子達不宜有異
請以三月二十九日爲大祥五月擇日而爲禫六月一日
而從吉於是大祥日不御前後殿開封府停決大辟及禁
屠至四月五日待制觀察使以上及宗室管軍官日一奠
二十八日而群臣俱入奠二十九日禫除群臣皆奉慰焉

治平四年正月八日英宗崩神宗即位十一日大斂二月三日殯四月三日請謚十八日奏告及讀謚冊于福寧殿七月二十五日啓散八月八日靈駕發引二十七日葬永厚陵禮院準禮群臣成服後乘布裘鞍韉小祥臨訖除頭冠方裙大袖大祥臨訖裏素紗軟脚幘頭慘公服乘卓鞍韉禫除訖素紗幘頭常服黑帶二日改吉服去佩魚虞主至自掩壙五虞皆在途四虞於集英殿曲赦兩京畿內鄭孟等州如故事

元豐八年三月五日神宗崩十三日大斂帝成服十七日小祥四月一日禫除七月五日請謚于南郊九月八日讀

謚寶冊于福寧殿二十三日啓葭十月一日靈駕發引二十一日葬永裕陵二十九日虞主至十一月一日虞祭于集英殿自復土六虞在途太常卿攝事三虞行禮于殿四日卒哭五日祔廟祕書正字范祖禹言先王制禮以君服同于父皆斬衰三年蓋恐爲人臣者不以父事其君此所以管乎人情也自漢以來不惟人臣無服而人君遂亦不爲三年之喪唯國朝自祖宗以來外廷雖用易月之制而宮中實行三年之喪且易月之制前世所以難改者以人君自不爲服也今群臣易月而人主實行三年之喪故十二日而小祥而暮又小祥二十四日大祥再暮而又大祥

夫練祥不可以有二也既以日爲之又以月爲之此禮之無據者再朞而大祥中月而禫禫者祭之名非服之色也今乃爲之慘服三日然後禫此禮之不經者也既除服至葬而又服之蓋不可以無服也祔廟而後即吉財八月矣而遽純吉無所不佩此又禮之無漸也易月之制因襲已久既不可追宜令群臣朝服止如今日而未除衰至朞而服之漸除其重者再朞而又服之乃釋衰其餘則君服斯服可也至於禫不必爲之服惟未純吉以至於祥然後無所不佩則三年之制略如古矣詔禮官詳議禮部尚書韓忠彥等議朝廷典禮時世異宜不必循古若先王之制不

可盡用則當以祖宗故事爲法今言者欲令群臣服喪三年民間禁樂如之雖過山陵不去衰服庶協古制緣先王恤典節文甚多必欲循古又非特如所言而已今旣不能盡用則當循祖宗故事及先帝遺制詔從其議神主祔廟是月冬至百官表賀崇政殿說書程頤言神宗喪未除節序變遷時思方切恐失居喪之禮無以風化天下乞改賀爲慰不從紹聖四年太史請遷去永裕陵禁山民塚一千三百餘以便國音帝曰遷墓得無擾乎若無所害則令勿遷果不便國音當給官錢以資葬費

元符三年正月十二日哲宗崩徽宗即位詔山陵制度並

如元豐七月十一日啓散二十日靈駕發引八月八日葬
永泰陵九月一日以升祔畢群臣吉服如故事太常寺言
太宗皇帝上繼太祖兄弟相及雖行易月之制實斬衰三
年以重君臣之義公除已後庶事相稱具載國史今皇帝
嗣位哲宗實承神考之世已用開寶故事爲哲宗服衰重
今神主已祔百官之服並用純吉皇帝服御宜如太平興
國二年故事禮部言太平興國中宰臣薛居正表稱公除
以來庶事相稱獨命徹樂誠未得宜即是公除後除不舉
樂外釋衰從吉事理甚明今皇帝當御常服素紗展脚幞
頭淡黃衫黑犀帶請下有司裁製宰臣請從禮官議乃詔

候周暮服吉時詔不由門下徑付有司給事中龔原言喪制乃朝廷大事今行不由門下是廢法也臣爲君服斬衰三年古未嘗改且陛下前此議服禮官持兩可之論陛下既察見其姦其服遂正今乃不得已從之臣竊爲陛下惜開寶時并汾未下兵革未弭祖宗擲風沐雨之不暇其服制權宜一時非故事也原坐黜知南康軍於是詔依元降服喪三年之制其元符三年九月自小祥從吉指揮改正紹興五年四月甲子徽宗崩于五國城七年正月問安使何蘓等還以聞宰執入見帝號慟擗踊終日不食宰臣張浚等力請始進糜粥成服于几筵殿文武百僚朝晡臨於

行宮自聞喪至小祥百官朝晡臨自小祥至禫祭朝一臨
太常等言舊制沿邊州軍不許舉哀緣諸大帥皆國家腹
心爪牙之臣休戚一體至於將佐皆懷忠憤宜就所屯自
副將而上成服日朝晡臨故校哭於本營命徽猷閣待制
王倫等爲奉迎梓宮使時知邵州胡寅上疏略曰三年之喪
自天子至於庶人一也及漢孝文自執謙德用日易月至今
行之子以便身忘其親臣以便身忘其君心知其非而不
肯改自常禮言之猶且不可況變故特異如今日者又當
如何恭惟大行太上皇帝大行寧德皇后蒙塵北狩永訣
不復實繇粘罕是有不共戴天之讎考之於禮讎不復則

服不除寢苦枕戈無時而終所以然者天下雖大萬事雖衆皆無以加於父子之恩君臣之義也伏觀某月某日聖旨緣國朝故典以日易月臣切以爲非矣自常禮言之猶須大行有遺詔然後遵承今也大行詔旨不聞而陛下降旨行之是以日易月出陛下意也大行幽厄之中服御飲食人所不堪疾病粥藥必無供億崩殂之後衣衾歛藏豈得周備正棺卜兆知在何所茫茫沙漠瞻守爲誰伏惟陛下下一念及此荼毒摧割備難堪忍縱未能遵春秋復讎之義俟讎殄而後除服猶當革漢景之薄喪紀以三年爲斷不然以終身不可除之服二十七日而除之是薄之中又

加薄焉必非聖人之所安也又曰雖宅憂三祀而軍旅之事皆當決於聖裁則諒闇之典有不可舉蓋非枕塊無聞之日是乃枕戈有事之辰故魯侯有周公之喪而徐夷並興東郊不開則是墨衰即戎孔子取其誓命今六師戒嚴方將北討萬幾之衆孰非軍務陛下聽斷平決得禮之變卒哭之後以墨衰臨朝合於孔子所取其可行無疑也如合聖意便乞直降詔旨云恭惟太上皇帝寧德皇后誕育眇躬大恩難報欲酬罔極百未一伸鑿輿遠征遂至大故訃音所至痛貫五情想慕慈顏杳不復見怨讎有在朕敢忘之雖軍國多虞難以諒闇然衰麻枕戈非異人任以日

易月情所不安興自朕躬致喪三年即戎衣墨況有權制
布告中外昭示至懷其合行典禮令有司集議來上如敢
沮格是使朕爲人子而忘孝之道當以大不恭論其罪陛
下親御翰墨自中降出一新四方耳目以化天下天地神
明亦必有以佑助臣不勝大願六月張浚請謚于南郊戶
部尚書章誼等言梓宮未還久廢謚冊之禮請依景德元
年明德皇后故事行埋重虞祭祔廟之禮及依嘉祐八年
治平四年虞祭畢而後卒哭卒哭而後祔廟仍於小祥前
卜日行之異時梓宮之至宜遵用安陵故事行改葬之禮
更不立虞主從之九月甲子上廟號曰徽宗九年正月太

常寺言徽宗及顯肅皇后將及大祥雖皇堂未置若不先建陵名則春秋二仲有妨薦獻請先上陵名宰臣秦檜等請上陵曰永固徽宗與顯肅初葬五國城十二年金人以梓宮來還將至帝服黃袍乘輦詣臨平奉迎登舟易總服百官皆如之既至行在安奉于龍德別宮帝后異殿禮官請用安陵故事梓宮入境即承之以槨有司預備袞冕暈衣以往至則納之槨中不復改斂秦檜白令侍從臺諫禮官集議靈駕既還當崇奉陵寢或稱攢宮禮部員外郎程敦厚希檜意獨上奏言仍攢宮之舊稱則莫能示通和之大信而用因山之正典則若亡存本之後圖臣以爲宜勿徇虛名當示大信於是議者

工部尚書莫將等乃言太史稱歲中不利大葬請用明德皇后故事權攢從之以八月奉迎九月發引十月掩攢在昭慈攢宮西北五十步用地二百五十畝十三年改陵名曰永祐紹興三十一年五月金國使至以欽宗訃聞詔朕當持斬衰三年之服以申哀慕是日文武百僚並常服黑帶去魚詣天章閣南空地立班聽詔旨舉哭畢次赴後殿門外進名奉慰次詣几筵殿焚香舉哭六月權禮部侍郎金安節等請依典故以日易月自五月二十二日立重安奉几筵至六月十七日大祥所有衰服權留以待梓宮之還從之七月宰臣陳康伯等率百官詣南郊請謚廟號欽宗遙上

陵名曰永獻其餘並如徽宗典禮

淳熙十四年十月八日高宗崩孝宗號慟擗踊踰二日不進膳尋諭宰執王淮欲不用易月之制如晉武魏孝文實行三年之喪自不妨聽政淮等奏通鑑載晉武帝雖有此意後來只是宮中深衣練冠帝曰當時群臣不能將順其美司馬光所以譏之後來武帝竟欲行之淮曰記得亦不能行帝曰自我作古何害淮曰御殿之時人主衰經群臣吉服可乎帝曰自有等降乃出內批朕當衰經三年群臣自行易月之令其合行儀制令有司討論詔百官於以日易月之內衰服治事二十日丁亥小祥帝未改服王淮等

乞俯從禮制上流涕曰大恩難報情所未忍二十一日車駕還內帝衰經御輦設素仗軍民見者徃徃感泣詔今自五日一詣梓宮前焚香帝欲衰服素幄引輔臣及班次而禮官奏謂苴麻三年難行於外庭奏入不出十一月戊戌朔禮官顏師魯尤衰等奏乞禮畢改服小祥之服去杖經禫祭禮畢改服素紗軟脚折上巾淡黃袍黑銀帶神主祔廟畢改服幘頭黑鞞犀帶遇過宮燒香則於宮中衰經行禮二十五月而除帝批淡黃袍改服白袍二日己亥大祥四日辛丑禫祭禮畢五日壬寅百官請聽政不允八日百官三上表引康誥被冕服出應門等語以證九日詔可十

五年正月十八日甲寅百日帝過宮行焚香禮二十一日
丁巳諭輔臣曰昨內引洪邁見朕已過百日猶服衰麤因
奏事應以漸今宜服如古人墨衰之義而巾則用繒或羅
朕以羅絹非是若用細布則可王淮等言尋常士大夫丁
憂過百日巾衫皆用細布出而見客則以黹布今陛下舉
曠古不能行之禮足爲萬世法帝又曰晚間引宿直宿之
類如何淮曰布巾布背子便是常服上不以爲然自是每
御延和殿止服白布折上巾布衫過宮則衰經而杖三月
壬子啓攢帝服初喪之服甲寅發引丙寅掩攢甲戌親行
第七虞祭大臣言虞祭乃吉禮合用鞞袍上曰只用布折

上巾黑帶布袍可也二十日丙戌神主祔廟是日詔曰朕
昨降旨揮欲衰經三年緣群臣屢請御殿易服故以布素
視事內殿雖有俟過祔廟勉從所請之詔稽諸典禮心實
未安行之終制乃爲近古宜體至意勿復有請於是大臣
乃不敢言蓋三年之制斷自帝心執政近臣皆主易月之
說諫官謝鏐禮官尤衷心知其不可而不敢盡言惟敕令
所刪定官沈清臣再上書願堅主聽大事於內殿之旨將
來祔廟畢日預降御筆截然示以終喪之志杜絕輔臣方
來之章勿令再有奏請力全聖孝以示百官以刑四海帝
納用焉仍詔樞官遵遺誥務從儉約凡修營百費並從內

庫母侵有司經常之費諸路監司州軍府監止進慰表其餘禮並免不得以進奉攢宮爲名有所貢獻上陵名曰永思

紹熙五年六月九日孝宗崩太皇太后有旨皇帝以疾聽在內成服太皇太后代皇帝行禮慶元二年六月九日大祥八月十六日禫祭時光宗不能執喪寧宗嗣服欲大祥畢更服兩月曰但欲禮制全盡不較此兩月於是監察御史胡紘言孫爲祖服已過暮矣議者欲更持禫兩月不知用何典禮若曰嫡孫承重則太上聖躬亦已康復於宮中自行二十七月之重服而陛下又行之是喪有二孤也自

古孫爲祖服何嘗有此禮詔侍從臺諫給舍集議吏部尚書葉翥等言孝宗升遐之初太上聖體違豫就宮中行三年之喪皇帝受禪正宜倣古方喪之服以爲服昨來有司失於討論今胡紘所奏引古據經別嫌明微委爲允當欲從所請參以典故六月六日大祥禮畢皇帝及百官並純吉服七月一日皇帝御正殿饗祖廟將來禫祭令禮官檢照累朝禮例施行四月庚戌詔群臣所議雖合禮經然於朕追慕之意有所未安早來奏知太皇太后面奉聖旨以太上皇帝雖未康愈宮中亦行三年之制宜從所議朕躬奉慈訓敢不遵依初高宗之喪孝宗爲三年服及孝宗之

喪有司請於易月之外用漆紗淺黃之制蓋循紹興以前之舊朱熹初至不以爲然奏言今已往之失不及追改惟有將來啓櫛發引禮當復用初喪之服則其變除之節尚有可議望明詔禮官稽考禮律豫行指定其官吏軍民方喪之服亦宜稍爲之制勿使肆爲華靡其後詔中外百官皆以涼衫視事蓋用此也方朱熹上議時門人有疑者未有以折之後讀禮記正義喪服小記爲祖後者條因自識於本議之末其略云準五服年月格斬衰三年嫡孫爲祖謂承重者法意甚明而禮經無文但傳云父沒而爲祖後者服斬然而不見本經未詳何據但小記云祖父沒而爲祖母

後者三年可以傍照至爲祖後者條下疏中所引鄭志乃有諸侯父有廢疾不任國致不任喪事之問而鄭荅以天子諸侯之服皆斬之文方見父在而承國於祖服向來上此奏時無文字可檢又無朋友可問故大約且以禮律言之亦有疑父在不當承重者時無明白證驗但以禮律人情大意荅之心常不安歸來稽考始見此說方得無疑乃知學之不講其害如此而禮經之文誠有關略不無待於後人向使無鄭康成則此事終未有所斷決不可直謂古經定制一字不可增損也已而詔于永思陵下宮之西修奉攢宮上陵名曰永阜

慶元六年光宗崩上陵名曰永崇

嘉定十七年寧宗崩上陵名曰永茂

景定五年理宗崩上陵名曰永穆

咸淳十年度宗崩上陵名曰永紹自孝宗以降外庭雖用
易月之制而宮中實行三年之喪云



志卷第七十五

<p>漢文六年漢宗廟上類名曰宗宗</p>	<p>漢文十七年漢宗廟上類名曰宗宗</p>	<p>景公六年漢宗廟上類名曰宗宗</p>	<p>漢文十年漢宗廟上類名曰宗宗</p>	<p>漢文十八年漢宗廟上類名曰宗宗</p>	<p>漢文二十六年漢宗廟上類名曰宗宗</p>	<p>漢文三十四年漢宗廟上類名曰宗宗</p>	<p>漢文四十二年漢宗廟上類名曰宗宗</p>	<p>漢文五十年漢宗廟上類名曰宗宗</p>	<p>漢文五十八年漢宗廟上類名曰宗宗</p>
----------------------	-----------------------	----------------------	----------------------	-----------------------	------------------------	------------------------	------------------------	-----------------------	------------------------

宋史一百二十

宋史一百二十

禮部言上柱國魯國重事節書丞相監脩國舅領經筵事都總裁臣脫脫等奉

禮修

禮二十六 凶禮二

園陵

秀安僖王園廟

上陵

濮安懿王園廟

莊文景獻二太子橫所

忌日群臣私忌附

皇后園陵太祖建隆二年六月二日皇太后杜氏崩于滋德殿三日百官入臨明日大斂攢于滋福宮百姓成服中書門下文武百僚諸軍副兵馬使以上並服布斜巾四脚直領襪衫外命婦帕頭帔裙衫九日帝見百官于紫宸門

太常禮院言皇后燕國長公主高氏皇弟泰寧軍節度使
光義嘉州防禦使光美並服齊衰三年準故事合隨皇帝
以日易月之制二十五日釋服二十七日禫除畢服吉心
喪終制從之七月太常禮院言準詔議定皇太后謚按唐
憲宗母王太后崩有司集議以謚狀讀于太廟然後上之
周宣懿皇后謚即有司撰定奏聞未常集議制下之日亦
不告郊廟修謚冊畢始告廟還讀于靈坐前詔從周制於
是太常少卿馮吉請上尊謚曰明憲皇后九月六日群臣
奉冊寶告于太廟翌日上于滋福宮十月十六日葬安陵
十一月四日神主祔太廟宣祖室乾德二年改卜安陵于

河南府鞏縣三月二十五日奉寶冊改上尊謚曰昭憲皇
太后讀于陵次二十六日啓故安陵二十七日靈駕發引
命攝太尉開封尹光義遣奠讀哀冊四月九日掩皇堂

太祖孝明孝惠二后乾德元年十二月七日皇后王氏崩
二十五日命樞密承旨王仁瞻爲園陵使時議改卜安陵
于鞏并以二后陪葬焉皇堂之制下深四十五尺上高三
十尺陵臺再成四面各長七十五尺神墻高七尺五寸四
面各長六十五步南神門至乳臺四十五步高二丈三尺
吉仗用中宮鹵簿凶仗名物悉如安陵而差減其數孝惠
又減孝明焉二年三月二十七日孝明皇后啓攢宮群臣

服初喪之服明日孝惠皇后自幄殿發引皆設遣奠讀哀冊四月九日葬孝惠于安陵之西北孝明于安陵之北二十六日皆祔于別廟其後孝明升祔太祖室

太祖皇后宋氏太宗至道元年四月二十八日崩帝出次素服舉哀輟朝五日六月六日上謚曰孝章皇后以歲在未
有忌權攢于趙村沙臺三年正月二十日祔葬永昌陵之北皇堂陵臺神墻乳臺鵲臺並如孝明園陵制度仍以故許王及夫人李氏魏王夫人王氏楚王夫人馮氏皇太子亡妻莒國夫人潘氏將軍惟正亡妻裴氏陪葬二月二日祔神主于別廟莒國潘氏至道三年六月追冊爲莊懷

皇后陵曰保泰神主祔后廟

太宗賢妃李氏真宗至道三年十二月追尊爲皇太后謚曰元德祔葬永熙陵大中祥符六年升祔太宗室

太宗明德皇后李氏真宗景德元年三月十五日崩十七日群臣上表請聽政凡五上始允帝去杖經服衰即御坐哀動左右太常禮院言皇后宜準昭憲皇太后禮例合隨皇帝以日易月之制宗室雍王以下禫除畢吉服心喪終制五日詳定園陵宜在元德皇太后陵西安葬八月十二日上謚九月二十二日遷坐于沙臺櫨宮十月七日祔神主太宗室二年十月十五日帝詣櫨宮致奠十六日發引

四百
二十九年
二十九日掩皇堂

眞宗章穆皇后郭氏景德四年四月十五日崩皇帝七日
釋服後改用十三日群臣三日釋服諸道州府官吏訃到
日舉哀成服三日而除二十一日司天監詳定園陵帝令
祔元德皇太后陵側但可安厝不必寬廣其棺槨等事無
得鑿刻花樣務令堅固二十五日殯于萬安宮之西階詔
兩制三館祕閣各撰挽詞閏五月十三日上謚曰莊穆六
月二十一日葬永熙陵之西北七月有司奉神主謁太廟
祔享于昭憲皇后享畢祔別廟大中祥符二年四月十五
日大祥詔特廢朝群臣奉慰

孟宗魯

真宗宸妃李氏仁宗明道元年二月二十六日薨初葬洪福禪院之西北命晏殊撰墓銘二年四月六日追冊爲莊懿皇太后十月五日改葬永定陵之西北隅十七日祔神主于奉慈廟

真宗章獻明肅皇后劉氏明道二年三月二十七日崩于寶慈殿遷坐于皇儀殿三十日宣遺詔群臣哭臨見帝于殿之東廂奉慰宗室削杖不散髮中書樞密使相比宗室去斜巾垂帽首經及杖翰林學士至龍圖閣直學士已上并節度使文武二品已上又去中單及袴兩省御史臺中丞文武百官以下四脚幅巾連裳腰經館閣讀書翰林待

詔伎術官并給孝服宰相百官朝晡臨三日內外命婦朝臨三日四月遣使告哀遼夏及賜遺留物十日司天監詳定山陵制度皇堂深五十七尺神墻高七尺五寸四面各長六十五步乳臺高一丈九尺至南神門四十五步鵲臺高二丈三尺至乳臺四十五步詔下宮更不修蓋餘依二十七日以宰臣張士遜爲山園使是日翰林學士馮元請上尊謚九月四日讀于靈坐十月五日葬永定陵之西北隅十七日祔神主于奉慈廟

眞宗章惠皇后楊氏明道三年十一月五日保慶皇太后崩太常禮院言皇帝本服總麻三月皇帝皇后服皆用細

布宗室皆素服吉帶大長公主以下亦素服並常服入內
就次易服三日而除詔以保祐沖人加服爲小功五日而
除四年正月十六日上謚二月六日葬永定陵之西北隅
十六日升祔奉慈廟

仁宗慈聖光獻皇后曹氏神宗元豐二年十月二十日太
皇太后崩于慶壽宮是日文武百官入宮宰臣王珪升西
階宣遺誥已內外舉哭盡哀而出二十六日大斂命韓縝
爲山陵按行使二十九日皇帝成服十一月韓縝言永昭
陵北稍西地二百十步內取方六十五步可爲山陵上以
迫隘縝言若增十步合徵火相主及中五之數詔增十步

十二月中書言先是司天監選年月遷祔濮安懿王三夫人今大行太皇太后山陵濮三夫人亦當舉葬於是詔宗室正任防禦使以上許從靈駕已從濮安王夫人者免從三年正月十四日上謚太常禮院言大行太皇太后雖已有謚然山陵未畢俟掩皇堂去大行稱慈聖光獻太皇太后祔廟題神主仍去二太字祕閣校理何洵直言按禮既葬日中還虞于正寢蓋古者之葬近在國城之比故可以平旦而往至日中即虞於寢所謂葬日虞弗忍一日離也後世之葬其地既遠則禮有不能盡如古者今大行太皇太后葬日至第六虞自當行之於外如舊儀其七虞及九

虞卒哭謂宜行之於慶壽殿又按春秋公羊傳曰虞主用桑士虞禮曰桑主不文伏請罷題虞主太常言洵直所引乃士及諸侯之禮況嘉祐治平並虞于集英殿宜如故事又嘉祐治平虞主已不書謚當依所請太常禮院又言慈聖光獻皇后祔廟前二日告天地社稷太廟皇后廟如故事至日奉神主先詣僖祖室次翼祖宣祖太祖太祖后太宗皇帝懿德皇后明德皇后同一祝次饗元德皇后慈聖光獻皇后異饌異祝行祔廟之禮次真宗仁宗英宗室禮畢奉神主歸仁宗室如此則古者祔謁之禮及近代徧饗故事並行不廢從之三月十日葬永昭陵二十二日祔于

太廟

英宗宣仁聖烈皇后高氏哲宗元祐八年九月三日崩于
崇慶宮遺詔皇帝成服三日內聽政群臣十三日諸州長
吏以下三日而除釋服之後勿禁作樂園陵制度務遵儉
省餘並如章獻明肅皇太后故事十四日詔園陵依慈聖
光獻太皇太后之制紹聖元年正月二十八日禮部言將
題神主謹按章獻明肅皇后神主書姓劉氏詔依故事四
月一日葬永厚陵

神宗欽聖憲肅皇后向氏建中靖國元年正月十三日崩
二月太常寺言大行皇太后山陵一行法物宜依元豐二

年慈聖光獻皇后故事皇堂之制下深六十九尺面方二丈五尺石地穴深一丈明高二丈一尺鵲臺二各高四十一尺乳臺二各高二丈七尺神墻高一丈三尺五月六日葬永裕陵二十六日祔于神宗廟室先是元祐四年美人陳氏薨贈充儀又贈貴儀徽宗入繼大統詔有司議追崇之典上尊謚曰欽慈皇后祔葬永裕陵與欽聖同祔神宗室崇寧元年二月聖瑞皇太妃朱氏薨制追尊爲皇太后遂上尊謚曰欽成皇后五月祔葬永裕陵祔神主於神宗室皆備禮如故事

哲宗皇后劉氏政和三年二月九日崩詔崇恩太后合行

禮儀可依欽成皇后及開寶皇后故事參酌裁定閏四月上謚曰昭懷皇后五月葬永泰陵祔神主於哲宗廟室

徽宗皇后王氏大觀二年九月二十六日崩尚書省言章穆皇后故事真宗服七日從之十月太史局言大行皇后園陵斬草用十月二十四日斥土用十一月十三日葬用十二月二十七日諸宗室合祔葬者並依大行皇后月日時刻十一月宰臣蔡京等請上謚曰靖和皇后十二月奉安梓宮于永裕陵之下宮神主祔別廟四年十二月改謚曰惠恭其後高宗復改曰顯恭

哲宗昭慈聖獻皇后孟氏紹興元年四月崩詔以繼體之

重當承重服以遺誥擇近地權殯俟息兵歸葬園陵梓取
周身勿拘舊制以爲他日遷奉之便六月殯于會稽上亭
鄉攢宮方百步下宮深一丈五尺明器止用鈔錫置都監
巡檢一員衛卒百人生日忌辰旦望節序排辦如天章閣
儀虞主還州行祔廟禮

徽宗顯仁皇后韋氏紹興二十九年崩祔于永祐陵攢宮
高宗憲聖慈烈皇后吳氏慶元三年崩時光宗以太上皇
承重寧宗降服齊衰碁四年三月甲子權攢于永思陵
孝宗成肅皇后夏氏開禧三年崩殯于永阜陵正北吏部
尚書陸峻言伏覩列聖在御間有諸后上仙緣無山陵可

祔是致別葬若上仙在山陵已卜之後無有不從葬者其
他諸后葬在山陵之前神靈既安並不遷祔惟元德章懿
二后方其葬時名位未正續行追冊其成穆皇后孝宗登
極即行追冊改殯所爲攢宮典禮已備與元德章懿事體
不同所以更不遷祔竊稽前件典禮祗緣喪有前後勢所
當然其於禮意却無隆殺今來從葬阜陵爲合典故從之
寧宗恭聖仁烈皇后楊氏紹定五年十二月崩祔葬茂陵
濮安懿王園廟治平三年詔置園令一人以大使臣爲之
募兵二百人以奉園爲額置柏子戶五十人廟三間二厦
神門屋二所及齋院神厨靈星門其告祭濮安懿王及諸

神祝文並本宮教授撰河南府給香幣酒脯禮物太祝奉禮則命永安縣尉主簿攝如闕官以本府曹官凡祭告及四仲饗並依此制奉安神主三獻命西京差判官一員亞獻朝臣一員終獻攝知園令出納神主廟制用一品夫人任氏墳域亦稱爲園元豐詔曰濮安懿王先帝斟酌典禮即園立廟詔王子孫歲時奉祀義協恩稱後世無得議焉今三夫人名位或未正塋域或異處有司置而不講曷足以彰明先帝甚盛之德仰承在天之志乎三夫人可並稱曰王夫人命主司擇歲月遷祔濮園俾其子孫以時奉主與王合食而致孝思焉禮官奏請王夫人遷葬給鹵簿全

仗用鼓吹至國門外減半喪行與四時告享並令嗣濮王
主之南渡後主奉祠事以嗣濮王爲之園令一員以宗室
爲之祠堂主管兼園廟香火官一員以武臣爲之紹興二
年九月詔每歲給降福建度牒一十道充祠堂仲饗忌祭
五年二月嗣濮王仲湜言被旨迎奉濮安懿王神主至行
在今已至紹興府欲權就本處奉安從之先是神主神貌
在廬州嗣濮王士從乞奉遷於穩便州郡安奉故也十三
年五月知大宗正事權主奉濮安懿王祠堂士恡言濮安
懿王祠貌神主權於紹興府光孝寺仲享薦祭其獻官牲
牢料禮並多簡略乞令有司討論舊制行下禮部太常寺

令參酌欲令士套攝初獻仍差士套子或從子二人攝亞
終獻其合用牲牢羊豕各一籩豆各十設禮料初獻合服
八旒冕亞獻終獻合服四旒冕奉禮郎太祝太官令服無
旒冕並以舊制從事從之二十六年二月嗣濮王士儉言
濮安懿王祠堂外無門牖內闕龕帳別無供具望下紹興
府置造修奉淳熙五年四月詔濮安懿王祠堂園廟自今
實及三年令本堂牒紹興府檢計修葺從嗣濮王士輅請
也

秀安僖王園廟紹熙元年三月詔秀王襲封等典禮禮部
太常寺乞依濮安懿王典禮避秀安僖王名一字詔恭依

仍置園廟四月詔皇伯滎陽郡王伯圭除太保依前安德
軍節度使充萬壽觀使嗣秀王以奉王祀六月禮部太常
寺言濮安懿王園廟制度廟堂神門宜並用獸所安木主
石埴于室中西壁三分之一近南去地四尺開埴室以石
爲之其中可容神主跌置今來秀安僖王及夫人神主欲
乞並依上件典禮四仲饗廟三獻官并奉禮郎等係嗣秀
王充初獻本位姪男攝亞終獻其奉禮郎等乞湖州差官
充攝行禮合用牲牢羊豕湖州排辦祭器祭服工部下文
思院製造每遇仲饗本府前期牒報湖州排辦所有行禮
儀注乞從太常寺參照濮安懿王儀注修定並從之其園

廟差御帶霍漢臣同湖州通判一員相度聞奏八月霍漢
臣暨通判湖州朱僎言奉詔相度園廟以圖來上十月詔
委通判一員提督修造祠堂如法修蓋十一月禮工部太
常寺言濮安懿王園廟三間二厦神門屋二坐齋院神厨
靈星門欲令湖州照應建造從之三年正月一日嗣秀王
伯圭奏建造秀安僖王園廟近已畢工所有修製神主儀
式令所司檢照典故修製委官題寫詔差權禮部尚書李
巖題寫二月伯圭又奏秀安僖王祠堂園廟乞從濮安懿
王例每三年一次從本所移牒所屬州府檢計修造從之
莊文太子喪禮乾道三年七月九日皇太子薨設素幄于

太子宫正廳之東皇帝自內常服至幄俟時至易服阜幩頭白羅衫黑銀帶絲鞋就幄發哀是日皇后服素詣宮隨時發哀如宮中之禮合赴陪位官並常服吉帶入麗正門詣宮幕次俟時至常服黑帶立班俟發哀畢易吉服退自發哀至釋服日皇帝不視事權禁行在音樂仍命諸寺院聲鍾其小斂大斂合祭告以本宮主管春坊官一員行禮其餘祭告以諸司官行禮差護喪葬事一員左藏庫出錢二萬貫銀五千兩絹五千匹成服日皇帝服期次麤布幩頭襪衫腰經絹襯衫白羅鞵以日易月十三日而除皇后服次麤布蓋首長衫裙帔絹襯服白羅鞵六宮人不從服

皇太子妃及本宮人並斬衰三年文武百官成服一日而
除其文武合赴官及御史臺閣門太常寺引班祗應人並
服布幘頭襪衫腰繫布帶本宮官僚並服齊衰三日服臨
七日而除釋衰服後藏其服至葬日服葬畢而除十二日
詔故皇太子櫨所就安穆皇后櫨宮側近擇地繼而都大
主管所言太史局官等選到寶林院法堂堪充皇太子櫨
所從之十三日以皇太子薨告天地宗廟社稷宮觀十八
日賜謚莊文閏七月一日遣攝中書令尚書右僕射魏杞
奉謚冊寶于皇太子靈柩前百官常服入次日易黑帶行禮
畢常服赴後殿門外進名奉慰是夕皇帝詣東宮行燒香

之禮如宮中之儀二日出葬宰臣葉顥等詣靈柩前行燒香之禮興靈訖行事官陪位親王南班宗室東宮官僚入班廳下再拜宰臣升詣香案前上香酌茶奠酒訖舉冊官舉哀冊讀冊官跪讀讀訖宰臣再拜各降階立在位官皆再拜靈柩進行文武百僚奉辭于城外親王宗室並騎從至葬所掩壙畢辭訖退是日百僚進名奉慰四年五月禮部太常寺言國朝典故即無皇太子小祥典禮今參酌討論將來莊文太子小祥日乞皇帝前後殿特不視事其日先命侍從官一員常服詣太子神坐前行奠酌禮令本宮官僚常服陪位奠酌畢退次慶王恭王常服赴神坐前奠

酌畢退次太子妃并榮國公以下行家人禮至大祥日太子妃榮國公以下及本宮人行禮畢焚燒神帛衰服間月妃及榮國公行禫祭家人禮從之明年七月九日大祥是日皇帝不視事差簽書樞密院事梁克家詣太子宮行奠酌禮如前儀

景獻太子嘉定十三年八月六日薨其發哀制服並如莊文太子之禮九日詔護喪視殯所于莊文太子橫宮之東並依其制建造九月十日賜謚景獻遣攝中書令知樞密院事鄭昭先奉謚冊寶于皇太子靈柩前讀冊讀寶如儀訖班退至興靈日宰臣詣皇太子柩前行禮畢柩行其宗

室使相南班官常服黑帶並赴陪位騎從至葬所俟掩櫬畢奉辭訖退其日皇帝不視事百司赴後殿門外立班進名奉慰十四年七月二日小祥差知樞密院事鄭昭先充奠酌官十五年八月六日大祥九月十五日詔景獻太子几筵已徹高平郡夫人傅氏可特封信國夫人仍令主奉祭祀

上陵之禮古者無墓祭秦漢以降始有其儀至唐復有清明設祭朔望時節之祀進食薦衣之式五代諸陵遠者令本州長吏朝拜近者遣太常宗正卿或因行過親謁宋初春秋命宗正卿朝拜安陵以太牢春祠乾德三年始令宮

人詣陵上冬服歲以爲常開寶九年太祖幸西京過鞏縣
謁安陵奠獻雍熙二年宗正少卿趙安易言昨朝拜安陵
永昌陵有司止設酒脯香以未明行事不設燭燎又先赴
永昌陵後赴安陵及帝后二位不徧拜頗愆於禮事下有
司議曰按開元禮春秋二仲月司徒司空巡陵不設牲牢
之祀今請如宗廟薦享少加裁減除不設登劍牙槃食及
太常登歌外餘悉如大祠朝拜日有司豫于陵南百步道
東設次具翦除器以備洒掃設宗正卿位于兆外之左西
向陵官位於卿之東南執事官又於其南俱西向北上設
祭器禮料酒饌于兆門內宗正卿以下各就位再拜盥手

奠酒讀祝冊再拜先赴安陵次永昌陵次孝明孝惠懿德
淑德皇后陵從之景德三年眞宗將朝諸陵以宰臣王旦
爲朝拜諸陵大禮使太常禮院言朝陵故事合排小駕鹵
簿唐太宗朝獻陵宿設黃麾仗周衛陵寢今請周設黃麾
仗又唐制前一日陵令以玉冊進御親書近臣奉出陵令
受之今請造竹冊四副祝畢焚之其百官位舊設陵所從
祝官及皇親客使分於神道左右貞觀中並陪列司馬門
內今望準舊儀施行又舊儀詣寢宮至大次之時設百官
位奏請行禮望今先入赴寢殿立班貞觀中皇帝至小次
素服乘馬檢會今年正月車駕朝拜明德攢宮止服素白

衣當時皇帝在大祥之內今既服除望止服淡黃袍又按
貞觀永徽故事朝陵皆先親後尊拜辭訖出還大次便進
發今望先朝永熙陵行事及辭皇帝皆兩次再拜陪位官
每陵亦各兩次再拜今請皇帝詣安陵參辭四度再拜永
昌永熙陵各兩度設拜舊儀逐寢殿上食備太牢之饌珍
羞庶品近以羊豕代太牢今請備少牢之祭設奠讀冊畢
復詣寢宮上珍羞庶品別行致奠之禮又舊儀前發二日
太尉告太廟今請依禮徧告六室詔特服素白衣行事次
序如告太廟餘依所請四年正月車駕次鞏縣罷鳴鞭及
太常奏嚴金吾傳呼既至齋于永安鎮行宮太官進蔬膳

是夜漏未盡三鼓帝乘馬却輿輦繖扇至安陵素服步入司馬門行奠獻禮諸陵亦然又詣下宮凡上宮用牲牢祝冊有司奉事下宮備膳羞內臣執事百官陪位又詣元德太后陵奠獻別于陵西南設幄殿祭如下宮禮畢徧詣孝明孝惠孝章懿德淑德明德莊懷七后陵遂單騎從內臣巡視陵闕而親奠夔魏岐鄆安周六王及恭孝太子諸墳其三陵陪葬皇子皇孫公主之未出閤者及諸王夫人之蚤亡者各設位次諸陵下宮之東序安陵百二十一墳量設三十位男子女子共祝版二昌陵十五墳量設十位熙陵八墳量設五位並祝版一以致祭焉辰後暫詣幄次更

衣復詣諸陵奉辭有司以朝拜無辭禮帝不忍故復往仍遣官祭一品皇親諸親墓大中祥符四年正月祀汾陰經鞏縣有司請于訾村王臺設幄殿置三陵神坐皇帝韠袍就幄設香酒時果牙槃食奠獻而命大臣以香幣酒脯詣諸陵致告駕還復行親謁之禮帝素服乘馬至永安縣齋于行宮夜漏未盡二鼓詣三陵及元德太后明德皇后陵奠獻哀慟未明禮畢復詣四陵奉辭省視几筵奠獻如初禮又徧詣諸后陵諸王墳致奠命中使徧祭皇親諸親墳及汝州秦王墳是歲命禮官定春秋二仲遣官朝陵儀注以祭服行事專差宗正卿一員朝拜三陵別遣官二員分

拜諸陵又製長竿檐床二副置陵表祝版遣寬衣軍士三十二人輿送陵下其後添差陵廟行禮官四員選朝官京官宗姓者充翰林學士錢惟演言春秋朝陵載于舊式公卿親往蓋表至恭唐顯慶中始詔三公行事天寶以後亦遣公卿巡謁蓋取朝廷大臣不必須同國姓後參用太常宗正卿晉開運中亦命吏部侍郎近年以來止遣宗正寺官人輕位卑實虧舊制望自今于丞郎諸司三品內遣官闕則差兩省諫舍以上所冀仰副追孝之心以成稽古之美景祐初滄州觀察使守節言寒食節例遣宗室拜陵而十月令內司賓往非所以致恭乃詔宗室正刺史以上一

貞朝拜四年減柏子戶安陵永昌永熙各留四十戶永定
五十戶會聖宮十戶慶曆二年寒食十月朔宗室刺史以
上聽更往朝陵皇祐三年太常博士李壽朋奏帝后諸陵
薦饗皆有時獨昭憲皇后以合葬安陵不及時祭禮院言
朝拜儀注牲牢並如太廟常饗例諸陵止奠一爵而安陵
奠兩爵兩贊再拜惟祭饌不兼設蓋有司相承失之於是
詔安陵昭憲皇后祝版牲幣御封香依太廟同室禮更造
諸陵祭器貯別庫三陵皆置卒五百人唯定陵以章獻太
后故別置一指揮昭陵使甘昭吉引定陵例請置守陵奉
先兩指揮京西轉運司請減定陵卒半以奉昭陵詔選募

一指揮額五百人初永安縣官月朔朝定陵望朝三陵韓琦言昭陵未有朝日乃令縣官朔望分朝諸陵熙寧中詔文臣大兩省武臣閣門使以上經過陵下並許朝拜又詔目今臣僚朝拜諸陵除見任嘗任執政官許進湯餘止莫獻薦新不特拜初故事車駕詣陵謂之親謁南渡之後此禮不舉故上陵或曰省視或曰保護或曰薦獻或曰祭告或曰致祭或曰望祭或曰修奉悉遣官不專於行禮也建炎元年五月一日詔應永安軍祖宗陵寢可差西京留守及臺臣一員躬親省視如有合修奉去處措置奏聞仍詔鄜延路副總管劉光世充省視陵寢使又詔河南府鎮撫

使翟興團結本處義兵保護祖宗陵寢四年六月詔令禮部給降度牒一百道充祭告諸陵禮料仍令翟興所差來人賁祭告表以行紹興元年九月起居郎陳與義言陛下躬履艱難之運駐蹕東南列聖陵邑遠在洛師顧瞻山川未得時省雖欲遣使道路不通聖懷日憤近聞道路少通差易前日願詔執事每半年擇遣使臣兩員往省諸陵詔令樞密院每半年差使臣兩員前去三年正月禮部太常寺言春秋二仲薦獻諸陵乞于行在法惠寺設位望祭行禮從之自是每歲薦獻率循此制五月詔令戶部支金一百兩付河南府鎮撫使司幹辦公事任直清充祭告永安

軍諸陵九年正月上謂輔臣曰祖宗陵寢久淪異域今金

國既割還故地便當遣宗室使相與臣僚前去修奉洒掃

尋命同判大宗正事士儂兵部侍郎張燾前去河南府祇

謁修奉六月太常丞梁仲敏等言春秋二仲遣宗室遙郡

防禦使薦獻諸陵太常少卿薦獻永祐陵權宜于行在設

位行禮今道路既通望依舊遣官前詣詔令西京留守司

候仲秋就便選官前詣諸陵薦獻士儂張燾回言諸陵下

石澗水自兵興以來涸竭幾十五年二使到日水即大至

父老驚嘆以爲中興之祥十年三月禮部言池州銅陵縣

丞呂和問進宮陵儀制望付太常寺以備檢照永安軍等

處今已收復遂委知軍詣諸陵逐位檢視除永定永昭永厚永裕永泰陵園廟並無損動內永安永昌永熙陵神臺墨裂未敢一面擅行補飾太常寺看詳若行補修合就差所委修飾官奏告行禮詔令河南府委官如法補飾不得滅裂其後兵部侍郎兼史館修撰張燾言伏見宣諭官方庭實有請乞將來先帝山陵一依永安陵等制度臣區區愚忠願明詔有司異時永固陵凡金玉珍寶盡斥不用播告天下咸使聞知如是自然可保無虞上嘉納之三十二年六月詔祖宗陵寢令本處招討使同本處官吏躬親朝謁如法修奉務在嚴潔以稱孝思之意乾道六年八月詔

承信郎劉湛特轉兩官右迪功郎劉師顏特與右承務郎升擢差遣秦世輔特轉一官升充正將以湛等歸正結義保護陵寢故也端平元年正月京西湖北安撫制置使史嵩之露布以滅金聞二月御筆國家南渡以後八陵迥隔常切痛心今京湖帥臣以圖來上恭覽再三悲喜交集凡在臣子諒同此情可令卿監郎官以上詣尚書省恭眡集議遂遣太常寺主簿朱揚祖國門祗候林拓朝謁八陵紹興元年六月太常寺言昭慈獻烈皇太后攢宮在越州會稽縣合依四孟朝獻禮例差宰執一員前一日赴攢宮泰寧寺宿齋至日行朝拜之禮詔同知樞密院事李回行禮

二年三月知紹興府張守言昭慈獻烈皇后攢宮近在府界望許臣以時朝謁從之自是守臣皆許朝謁十七年十一月殿中侍御史余堯弼言望舉行舊制於春秋二仲遣官詣永祐陵攢宮薦獻臣僚又言陵廟之祭月有薦新著在令典方今宗廟久已遵奉惟是永祐陵闕而未講望令有司討論舉而行之太常寺討論欲依政和五禮依典故令兩攢宮遵依每月檢舉差官行禮其新物令逐宮預行關報紹興府排辦從之二十七年六月詔永祐陵及昭慈聖獻皇后攢宮檢察承受以檢察宮陵所爲名三十年九月吏部言紹興府會稽知縣依倣陵臺令典故於階街內

帶兼主管攢宮事務量加優異淳熙元年正月禮部太常寺言春秋二仲差太常少卿薦獻永祐陵攢宮并周視陵域如遇少卿有缺乞從本寺前期取指揮差本寺以次官充攝所有今年仲春薦獻即日見闕少卿詔差太常丞錢良臣自後春秋遇少卿闕率以爲例慶元元年六月詔永阜陵孝宗皇帝攢宮每歲秋季一就令所差監察御史恭詣朝拜檢察從御史臺申請諸陵亦如之

忌日唐初始著罷樂廢務及行香修齋之文其後又朔望停朝令天下上州皆準式行香天祐初始令百官詣閣奉慰宋循其制惟宣祖昭憲皇后爲大忌前一日不坐群臣

詣西上閣門奉慰移班奉慰皇太后退赴佛寺行香凡大
忌中書悉集小忌差官一員赴寺如車駕巡幸道遇忌日
皆不進名奉慰留守自於寺院行香仍不得在拜表之所
天下州府軍監亦如之建隆二年宣祖忌日時明憲太后
在殯群臣止詣閣奉慰而罷行香乾德二年禘于太廟其
日惠明皇后忌有司言唐開成四年正月二十二日祀先
農與穆宗忌同日大和七年十二月八日蜡百神與敬宗
忌同日詔以近廟忌辰作樂非便宜令縣而不作竊以農
蜡之祭猶避廟忌而不作樂況僖祖同廟連室而在諱辰
詎可輒陳金石之奏伏望依禮縣而不作其後宣祖昭憲

忌日詔準太祖太宗奉翼祖禮前一日更不廢務咸平中
有司將設春宴金明池習水戲開瓊林苑縱都人游賞帝
以是月太宗忌月命詳定故事以聞史館檢討杜鎬等言
按晉穆帝納后月是康帝忌月禮官荀訥議有忌日無忌
月若有忌月即有忌時忌歲益無所据當時從訥所議唐
武后神功元年建安王攸宜破契丹詣闕獻捷軍人入城
例有軍樂內史王及善以國家忌月請備而不奏鳳閣侍
郎王方慶奏按禮經有忌日而無忌月遂舉樂憲宗時太
常博士韋公肅言禮無忌月禁樂今太常教坊以正月爲
忌月停郊廟饗宴之昔中外士庶咸罷宴樂竊恐乖宜時

依公肅所奏伏以忌日不樂嘗載禮經忌月徹縣實無典故況前代鴻儒議論足据其春宴及池苑並合舉樂景德元年北征凱旋京師是日以懿德皇后忌詔徹鹵簿鼓吹禮官議曰班師振旅國之大事后之忌日家之私事今大駕凱旋軍容宜肅昔武王伐紂在諒闇中猶前歌後舞夫諒闇是重遠忌是輕以此而論舉樂無爽況春秋之義不以家事辭王事其還京日法駕鼓吹音樂並請振作尋詔自今宗廟忌日西京及諸節鎮給錢十千防團禦練州七千軍事州五千以備齋設元德皇后忌日舊制樞密使依內諸司例惟進名不赴行香知樞密院王欽若以爲言自

是三司使副翰林樞密龍圖直學士並赴馬真宗崩元德
明德皇后忌日在禫制內乃停進名行香凡奉慰宰相樞
密使各帥百官內職共進名節度使留後觀察使各進名
忌日前後各禁刑三日如天慶節釋杖以下情輕者復斷
屠宰不視事前後各三日禁樂各五日其後以歲月漸遠
禁刑不視事各二日禁樂各三日章憲明肅太后忌辰禮
官請依章懿太后禮例前後各二日不視事一日禁屠宰
各三日禁樂詔應大忌日行香臣僚並素食復立孝惠孝
章淑德章懷章惠溫成諸后爲小忌未幾罷神宗即位太
常禮院言僖祖及文懿皇后神主旣祧準禮不諱忌日亦

請依唐睿宗祧遷故事廢之初神御殿酌獻設皇帝位于
庭下而忌日兩府列于殿上寺院行香左右巡使兩赤縣
令于中門相向分立俟宰臣至立位前直省官贊通揖于
禮無據乃命行香群臣班殿下宰相一負升殿跪爐而罷
通揖又詔大忌日不爲假執政官蚤出禮部言順祖及惠
明皇后旣葬遷主罷行香忌日請于永昌院佛殿之東張
幄齋薦乃詔僖祖翼祖并六位忌日咸如之先是翼祖簡
穆皇后神主奉藏夾室依禮不忌後復詔還本室而忌日
亦如舊焉政和新儀群臣進名奉慰其日質明文武朝參
官入詣朝堂就次御史臺先引殿中侍御史一負入就位

次西上閣門御史臺分引朝參官及諸軍將校次禮直官引三公以下在西上閣門南階下每等重行異位並北向東上知西上閣門官于班前西向立搢笏執名紙躬三公以下文武百僚俱再拜俟閣門官執笏置名紙笏上入西上閣門訖退群臣奉慰詣景靈宮每等重行異位並北向東上禮直官揖班首以下再拜訖引班首自東階升殿舍人接引同升詣香案前搢笏上香跪奠茶訖執笏興降階復位又再拜次引班首以下分左右搢笏行香宰相執政官分左右行香訖執笏俱復位次引班首升殿詣香案前俛伏跪搢笏執爐俟讀疏畢執笏俛伏興降階復位又再

拜退中興之制忌日百僚行香在外州軍亦詣寺院行香
如在以日易月服制之內並依禮例權停大祥後次年於
曆日內箋注立忌辰禁音樂一日紹興元年二月太常少
卿蘇遲等以徽宗欽宗留北有朔望遙拜之禮乃言凡遇
祖宗帝后忌前一日并忌日皇帝自內先服紅袍遙拜訖
易服行禮從之二年八月詔應諸路州軍見屯軍馬統兵
官每遇國忌免行香十三年正月御史臺言正月十三日
欽聖憲肅皇后忌其日立春準令諸臣僚及將校立春日
賜幡勝遇稱賀等拜表忌辰奉慰退即戴欲乞候十三日
忌辰行香退即行戴插從之三十二年六月禮部侍郎金

安節等言六月二十八日欽慈皇后忌辰係在淵聖皇帝以日易月釋服之外百官行香宜如常制詔依三十二年正月禮部太常寺言已降旨欽宗祔廟翼祖當遷於正月九日告遷翼祖皇帝簡穆皇后神主奉藏于夾室所有以後翼祖皇帝忌及諱簡穆皇后忌欲乞依禮不諱不忘詔恭依淳熙元年十一月詔文武百僚詣景靈宮國忌立班行香自今如遇宰執俱致齋不及趨赴于東班從上引官一員升殿跪爐行香以次官一員詣西班行香先是閣門得旨國忌行香宰執致齋不赴其西壁武臣闕官押班已降旨揮差使相或太尉節度使等押班可令文武班內班

上一員東壁押班止令西壁散香今後準此至是禮部太常寺重別指定來上故有是命四年十月太常少卿齊慶胄言每遇國忌文臣班列莫敢不肅唯是武臣一班員數絕少或以疾病在告多不趁赴詔閣門御史臺申嚴行下如有違戾彈劾聞奏九年十月侍御史張大經奏比來國忌行香日分合赴官類多託疾在告以免夙興拜跪之勞乞自今如遇行香日有稱疾託故不赴者從本臺彈奏乞置典憲從之

群臣私忌開寶敕文應常參官及內殿起居職官等自今刺史郎中將軍以下遇私忌請準式假一日忌前之夕聽

還私第其後有司言臣僚忌日恩賜其間甚有無名者如
劉繼元李煜劉鋹之類皆身為降俘亡沒已久而尚霑恩
賜及周朝忌日尚有追薦本朝亦有追尊皇后生日道場
并諸神祠亦有為生日者請付禮官詳議不經之物一切
省去詔周朝忌日仍舊餘罷之



志卷第七十六

志卷第七十七

宋史一百二十四

開府儀同三司上柱國錄軍國重事前書右丞相樞密國史領經筵事都總裁晏昉等奉

勅修

禮二十七 凶禮三

外國喪禮及入弔儀
諸臣喪葬等儀

凡外國喪告哀使至有司擇日設次於內東門之北
隅命官攝太常卿及博士贊禮俟太常卿奏請即向
其國而哭之五舉音而止皇帝未釋素服人使朝見
不宣班不舞蹈不謝面天額引當殿喝拜兩拜奏聖
躬萬福又喝拜兩拜隨拜萬歲或增賜茶藥及傳宣

無問即出班致詞訖歸位又喝拜兩拜隨拜萬歲喝
祇候退大中祥符二年十二月北朝皇太后凶訃遣
使來告哀詔遣官迓之廢朝七日擇日備禮舉哀成
服禮官詳定儀注以聞其日皇帝常服乘輿詣幕殿
俟時釋常服服素服白羅衫黑銀帶素紗軟脚幞頭
太常卿跪奏請皇帝為北朝皇太后凶訃至掛服又
奏請五舉音文武百僚進名奉慰退幕殿仍遣使祭
奠弔慰三年正月契丹賀正使為本國皇太后成服
所司設幕次香酒及衰服經杖等禮直官引使副已
下詣位北向再拜班首詣前執盞跪奠俛伏興歸位

皆再拜俟使已下俱衰服經杖成服訖禮直官再引
各依位北向舉哭盡哀班首少前去杖跪奠酒訖執
杖俛伏興歸位焚紙馬皆舉哭再拜畢各還次服吉
服歸驛天聖八年六月契丹使來告哀禮官詳定北
朝凶訃宜於西上閣門引來使奉書令閣門使一員
跪受承進宰臣樞密使已下待制已上並就都亭驛
弔慰七月一日使者耶律乞石至帝與皇太后發哀
苑中使者自驛赴左掖門入至左昇龍門下馬入北
偏門階下行至右昇龍北偏門入朝堂西偏門至文
德殿門上奉書太常博士二員與禮直官贊引入文

德殿西偏門階下行至西上閣門外階下面北跪進書閣門使跪受承進太常博士禮直官退使者入西上閣門殿後偏門入宣祐西偏門行赴內東門柱廊中間過幕次祇候朝見訖赴崇政殿門幕次祇候朝見皇太后訖出三日近臣慰乞石于驛嘉祐三年正月契丹告國母哀使人到闕入見皇帝問云卿離北朝日姪皇帝悲苦之中聖躬萬福朝辭日即云皇帝傳語北朝姪皇帝嬪太皇太后上僊遠勞人使訃告春寒善保聖躬中書樞密以下待制已上赴驛弔慰云竊審北朝太皇太后上僊伏惟悲苦五月獻遺留

物明道元年十一月二十四日敕夏王趙德明薨特
輟朝三日令司天監定舉哀掛服日辰其日乘輿至
幕殿服素服太常博士引太常卿當御坐前跪奏請
皇帝為夏王趙德明薨舉哀又奏請十五舉音又奏
請可止文武百僚進名奉慰告哀使副已下朝見首
領并從人作兩班見先首領見兩拜後班首奏聖躬
萬福又兩拜隨拜萬歲喝賜例物酒食跪受起又兩
拜隨拜萬歲喝各祗候退從人儀同是日皇太后至
幕殿釋常服白羅大袖白羅大帶舉哀如皇帝儀其
遣使致祭弔慰如契丹

其入弔奠之儀乾興元年真宗之喪契丹遣殿前都
點檢崇義軍節度使耶律三隱翰林學士工部侍郎
知制誥馬貽謀充大行皇帝祭奠使副左林牙左金
吾衛上將軍蕭日新利州觀察使馮延休充皇太后
弔慰使副右金吾衛上將軍耶律寧引進使姚居信
充皇帝弔慰使副所司預於滋福殿設大行皇帝神
御坐又於稍東設御坐祭奠弔慰使副並素服由西
上閣門入陳禮物於庭中書門下樞密院並立於殿
下再拜訖升殿分東西立禮直官閣門舍人贊引耶
律三隱等詣神御坐前階下俟殿上簾捲使副等並

舉哭殿上皆哭再拜訖引升殿西階詣神御坐前上
香奠茶酒貽謀跪讀祭文畢降階復位又舉哭再拜
訖稍東立俟皇太后升坐中書樞密院起居畢簾外
侍立舍人引弔慰祭奠使副朝見殿上舉哭左右皆
哭弔慰使副蕭日新等升殿進書訖降坐俟皇帝升
坐中書樞密院起居畢升殿侍立舍人引弔慰祭奠
使副朝見皇帝舉哭左右皆哭弔慰使副耶律寧等
升殿進書訖賜三隱等襲衣冠帶器幣鞍馬隨行舍
利牙校等衣服銀帶器幣有差弔慰使副蕭日新等
復詣承明殿俟皇太后升坐中書樞密院侍立如儀

舍人引蕭日新等升殿進問聖候書畢賜銀器衣著
有差仍就客省賜三隱等茶酒又令樞密副使張士
遜別會三隱等伴宴於都亭驛英宗即位契丹使來
賀乾元節命先進書奠梓宮見于東階放夏國使人
見客省以書幣入後弔慰使見殿門外契丹祭奠使
見于皇儀殿東廂群臣慰于門外使人辭于紫宸殿
命坐賜茶故事賜酒五行自是終諒闇皆賜茶神宗
之喪夏國陳慰使丁努冤名謨鐸副使呂則陳聿精
等進慰表于皇儀門外退赴紫宸殿賜帛有差元
祐初高麗入貢有太皇太后表及進奉物樞密院請

遵故事惟荅以皇帝回諭敕書已而宣仁聖烈太后崩禮部太常閣門同詳定高麗奉慰使人於小祥前後到闕令於紫宸殿門見客省受表以進賜噐物酒饌退並常服黑帶不佩魚候見罷純吉服淳熙十四年金國弔祭使到闕惟皇帝先詣梓宮行燒香禮及使入門祭訖皆就幄舉哭外陳設行事並如先朝舊儀其奉辭日有司亦先設神御坐及設香按茶酒果食盤臺於几筵殿上宰執升殿分東西立侍從官於殿下西面立使副入門殿上下皆哭使副升殿哭止使副詣神坐前一拜上香奠茶三奠酒畢拜興讀祭

文官詭讀祭文一拜興殿上下皆哭使副俱降歸位
立又再拜訖退

諸臣之喪國制諸王公主宗室將軍以上有疾皆乘
輿臨問如小疾在家或幸其第有至三四者其官邸
在禁中多不時而往惟宰相使相駙馬都尉疾亟幸
其第或賜勞加禮焉建隆元年七月宰相范質有疾
太祖親幸其第賜黃金銀絹有差開寶二年趙普有
疾帝再往視賜銀器絹甚厚太平興國中鎮寧軍節
度楊信久病瘖忽能言帝異之遽幸其第加賜賚大
中祥符三年三月鎮安軍節度使駙馬都尉石保吉

疾亟帝將臨視之其日大忌宰相言於禮非便遂遣
內侍以諭保吉明日始臨省焉六月幸翰林侍講學
士邢昺第視疾賜白金千兩衣著千匹名藥一奩熙
寧七年十二月詔頒新式凡臨幸問疾者賜銀絹宰
臣及樞密使帶使相者二千五百兩匹樞密使使相
二千兩匹知樞密院事叅知政事樞密副使同知樞
密院事一千五百兩匹簽書樞密院事同簽書樞密
院事宣徽使七百五十兩匹殿前都指揮使一千五
百兩匹駙馬都尉任使相以下者二千五百兩匹任
節度觀察留後以下者一千五百兩匹並入內內侍

三百八十三
省取賜

車駕臨奠太常新禮宰相樞密宣徽使叅知政事樞
密副使駙馬都尉薨皆臨幸奠酹及發引乘輿或再
往咸平二年工部侍郎樞密副使楊礪卒即日冒雨
臨其喪大中祥符元年殿前都虞候端州防禦使李
繼和卒真宗特臨其喪以問宰臣對曰繼和以品秩
實無此禮陛下敦序外族先朝亦嘗臨杜審瓊之喪
於禮無嫌帝然之即日幸其第康定二年右正言知
制誥吳育奏臣竊見車駕每有臨奠臣僚宗戚之家
皆即時出幸道路不戒羽衛不全從官奔馳衆目驚

異萬乘法駕豈慎重之意乎雖震悼方切於皇慈而舉動貴合乎經禮臣竊詳通禮舊儀蓋俟喪家成服然後臨奠於事不迫在禮亦宜臣愚欲乞今後車駕如有臨奠去處乞俟本家既歛成服然後出幸則恩意容典詳而得中警蹕羽儀備之有素事下禮官議遭喪之家有出殯日乃成服者恐至時難行臨奠請自今聖駕臨奠臣僚宗戚之家若奏訃在交未前即傳宣閣門只於當日令所屬候儀衛備奏請車駕出幸若奏訃在交未後即次日臨奠庶使羽衛整肅於事為宜詔可其儀乘輿自內出千牛將軍四人執戈

三百九十二人
一人執桃一人執芻前導車駕將至所幸之第贊禮者引喪主哭於大門內望見乘輿止哭再拜立於庭皇帝至幕殿改素服就臨喪主內外再拜皇帝哭十五舉音喪主內外皆哭皇帝詣祭所三奠酒喪主已下再拜皇帝退止哭從官進名奉慰皇帝改常服還內通禮著皇帝臨諸王妃主外祖父母皇后父母宗戚貴臣等喪出宮服常服至所臨處變服素服天聖喪葬令皇帝臨臣之喪一品服錫衰三品已上總衰四品已下疑衰皇太子臨弔三師三少則錫衰宮臣四品已上總衰五品已下疑衰

輟朝之制禮院例冊文武官一品二品喪輟視朝二日於便殿舉哀掛服文武官三品喪輟視朝一日不舉哀掛服然其車駕臨問并特輟朝日數各繫聖息一品二品喪皆以翰林學士已下為監護葬事以內侍都知已下為同監護葬事葬日輟視朝一日皆取旨後行慶曆五年四月禮院奏準度支員外郎集賢校理知院曾公亮奏朝廷行輟朝禮並乞以聞哀之明日輟朝其假日便以充數仍為永例如值其日前殿須坐則禮有重輕自可略輕而為重更不行輟朝之禮臣今看詳公亮所奏誠於輟朝之間適宜順變然

慮君臣恩禮之情有所未盡欲乞除人使見辭春秋
二宴合當舉樂即於次日輟朝餘乞依公亮所奏詔
可太平興國六年守司空兼門下侍郎平章事薛居
正薨準禮一品喪合輟二日詔特輟三日其後鄧王
錢俶太師趙普右僕射李沆薨皆一品合輟二日詔
並特輟五日二品三品者亦有特輟焉太平興國九
年右諫議大夫叅知政事李穆卒準禮諫議大夫不
合輟朝特輟一日開寶三年羅彥瓌魏仁浦薨以郊
祀及軍事不輟朝景德四年同平章事王顯薨以皇
帝朝拜諸陵吉凶難於相干更不輟朝康定元年光

祿卿鄭立卒禮官舉故事輟朝臺官言卿監職任踈
遠恩禮不稱自後遂不輟朝孝宗乾道三年四月一
日太常寺言皇伯母秀王夫人薨輟朝五日內二日
不視事乞自今月二日為始輟朝至六日止其二日
三日並不視事從之

舉哀掛服尚舍設次於廣德殿或講武殿大明殿其
後皆於後苑壬地前一日所司預設舉哀所幕殿周
以簾帷色用青素其日皇帝常服乘輿詣幕殿侍臣
奏請降輿俟時釋常服服素服白羅衫黑銀腰帶素
紗軟脚幘頭太常博士引太常卿當御坐前跪奏請

皇帝為某官薨舉哀又請舉哭十五舉音又奏請可
止中書門下文武百官進名於崇政殿門外奉慰皇
帝釋素服服常服乘輿還內建隆四年山南東道節
度使慕容延釗卒太祖素服發哀其後趙普薨太宗
亦如之景德四年李沆薨禮官言舉哀品秩雖載禮
典伏緣國朝惟趙普曹彬曾行茲禮今望裁自聖恩
詔特擇日舉哀自後宰臣薨皆用此禮真宗乳母秦
國延壽保聖夫人卒以太宗喪始著疑舉哀禮官言
通禮皇帝為乳母總麻按喪葬令皇帝為總一舉哀
止秦國夫人保傳聖躬宜備哀榮况太宗之喪已終

易月之制今為乳母發哀合於禮典從之鄭國長公
主薨禮官言降服大功擇日成服緣居大行皇太后
大祥之內衰服未除典禮舊章以輕包重酌情順變
禮當厭降罔不成服皇親諸親亦不制服帝曰宗室
諸王皆不制服情所未忍至期當遣諸王就其第成
服及令皇后臨奠餘如所請皇從弟右監門衛大將
軍德鈞卒以皇帝恭謁陵寢罷舉哀成服天禧元年
太尉王旦薨時季秋大亨明堂其日發哀真宗疑之
禮官言祠事在質明之前成服於既祠之後於禮無
嫌詔可康定二年皇子壽國公昕薨年二歲禮官言

已有爵命宜同成人遂發哀成服熙寧十年永國公
薨係無服之殤詔特舉哀成服元祐元年王安石薨
在神宗大祥之內司馬光薨亦在諒闇中皆不舉哀
成服高宗於劉光世張俊秦檜之喪皆為臨奠然設
幄舉哀成服之禮未之行也孝宗乾道三年始為皇
伯母秀王夫人薨設幕殿後苑壬地舉哀成服復舉
行焉皇太后皇后為本族之喪孝明皇后姊太原郡
君王氏卒中書門下據太常禮院狀準禮例皇后合
出就故彰德軍節度使王饒第發哀成服文武百僚
詣其第進名奉慰從之章穆太后母楚國太夫人吳

氏薨太常禮院言皇帝為外祖母本服小功詳開寶通禮即有舉哀成服之文又緣近儀大功以上方成服今請皇太后擇日就本宮掛服雍王以下為外祖母給假其後太后嫡母韓國太夫人薨亦用此制焉章獻明肅皇后改葬父母前一日皇后詣攢所俟時詣成服所改服總尚儀奏請詣靈柩發哭奠酒退六宮內人立班奉慰掩壙畢皇后詣墳奠獻再拜釋服還宮外命婦進殿奉慰如儀

輟樂太平興國七年十月中書言今月七日乾明節選定二十二日大宴二十日叅知政事實傳卒明日

皇帝親幸其第臨喪慟哭設奠還宮即令罷宴有司
奏伏以百司告備六樂在庭睿聖至仁聞哀而罷是
以顯君父愛慈之道勵臣子忠孝之心伏請宣付史
館傳錄美實詔可天禧二年九月十一日宴近臣于
長春殿餞河陽三城節度使張旻赴任以王旦在殯
不舉樂嘉祐六年三月五日宰臣富弼母秦國太夫人
薨十七日春宴禮院上言君臣父子家國均同元
首股肱相濟成體貴賤雖異哀樂則同一人向隅滿
堂嗟戚今宰臣新在苦塊欲乞罷春宴聲樂以表聖
人憂恤大臣之意詔下并春宴寢罷

賻贈凡近臣及帶職事官薨非詔葬者如有喪訃及
遷葬皆賜賻贈鴻臚寺與入內內侍省以舊例取旨
其嘗踐兩府或任近侍者多增其數絹自五百匹至
五十匹錢自五十萬至五萬又賜羊酒有差其優者
仍給米麥香燭自中書樞密而下至兩省五品三司
三館職事內職軍校并執事禁近者亡歿及父母近
親喪皆有贈賜宗室蕃功袒免乳母殤子及女出適
者各有常數其特恩加賜者各以輕重為隆殺焉建
隆元年十月詔有死于矢石者人給絹三匹仍復其
家三年長吏存撫之慶曆二年詔陣亡軍校無子孫

者賜其家錢指揮使七萬副指揮使六萬軍使都頭副兵馬使副都頭五萬熙寧七年參酌舊制著為新式諸臣喪兩人以上各該支賜孝贈只就數多者給官與職各該賻贈者從多給差遣權并同權發遣並與正同諸兩府使相宣徽使并前任宰臣問疾或澆奠已賜不願救葬者并宗室不經澆奠支賜雖不係救葬並支賻贈餘但經問疾或澆奠支賜或救葬者更不支賻贈前兩府如澆奠只支賻贈仍加絹一百布一百羊酒米麪各一十諸支賜孝贈在京羊每口支錢一貫以折第二等絹充每匹折錢一貫三百文

餘支本色在外米支白杭米麩每石支小麥五斗酒
支細色餘依價錢諸文臣卿監以上武臣元係諸司
使以上分司致仕身亡者其賻贈並依見任官三分
中給二限百日內經所在官司投狀召命官保關申
限外不給待制觀察使以上更不召保元豐五年詔
邠延路沒於王事有家屬見今在本路欲歸鄉者給
賻外其大使臣以上更支行李錢百千小使臣五十
千差使殿侍三十千其餘比類支給紹興二十六年
詔今後命官實因幹辦公事邂逅非理致死者並遵
依舊法所有李光申請於紹興條內添注日限指揮

更不施行舊法非理致死者謂焚溺墜壓之類通判以上賜銀五百兩餘三百兩職司已上取旨初紹興二年五月吏部侍郎李光申明立定折跌骨五十餘日三十日內身亡之人並支前項銀數至是戶部侍郎宋貺言自立定日限後來多是因他病身故之人子孫規圖賞給計會所屬旋作差出名目陳乞保奏誠為欺罔故有是命

詔葬禮院例冊諸一品二品喪敕備本品鹵簿送葬者以少牢贈祭於都城外加壁束帛深青三纁二諸重一品柱鬲六五品已上四六品已下二諸銘旌三

品已上長九尺五品已上八尺六品已上七尺皆書
某官封姓之柩諸輜車三品已上油幟朱絲絡網施
襪兩廂畫龍幟竿諸末垂六旒蘇七品已上油幟施
襪兩廂畫雲氣垂四旒蘇九品已上無旒蘇庶人鼈
甲車無幟襪畫飾諸引披鐸斐挽歌三品已上四引
四披六鐸六斐挽歌六行三十六人四品二引二披
四鐸四斐挽歌者四行十六人五品六品挽歌八人
七品八品挽歌六人六品九品謂非并朝者挽歌四人其持引
披者皆布幘布深衣挽歌白練幘白練禱衣皆執鐸
綽並鞵襪諸四品已上用方相七品已上用魃頭諸

燾五品已上其竿長九尺已下五尺已上諸葬不得以石為棺槨及石室其棺槨皆不得雕鏤彩畫施方牖檻棺內不得藏金寶珠玉又按會要勲戚大臣薨卒多命詔葬遣中使監護官給其費以表一時之恩凡凶儀皆有買道方相引輓車香蓋紙錢鵝毛影輿錦繡虛車大輿銘旌儀棺行幕各一挽歌十六其明器牀帳衣輿結綵牀皆不定數墳所有石羊虎墜柱各二三品以上加石人二人入墳有當壙當野祖思祖明地軸十二時神誌石券石鐵券各一殯前一日對靈柩及至墳所下事時皆設敕祭監葬官行禮熙寧

初又著新式頒于有司乾德六年三月中書令秦國
公孟昶薨其母李氏繼亡命鴻臚卿范禹偁監護喪
事仍詔禮官議定吉凶儀仗禮例以聞太常禮院言
檢詳故事晉天福十二年葬故魏王周廣順元年葬
故樞密使揚邠侍衛使史弘肇三司使王章例並用
一品禮墓方圓九十步墳高一丈八尺明器九十事
石作六事音身隊二十人當壙當野祖明祖思地軸
十二時神蚊厨帳暖帳各一輜車一挽歌三十六人
拂一燾一翼六輜車菟車儀槨車買道車誌石車各
一方相氏鵝毛燾銘旌香輿影輿蓋輿錢輿五穀輿

酒醢輿衣物輿庖牲輿各一黃白紙帳園宅象生什物行幕并誌文挽歌詞啓攢啓奠祝文並請下有司脩製其儀太僕寺革輅兵部本品鹵簿儀仗太常寺本品鼓吹儀仗殿中省繳一曲蓋二朱漆團扇四自第導引出城量遠近各還贈玉一纁二贈祭少牢禮料亦請下光祿太府寺少府監諸司依禮供應又楚王母依子官一品例準令文外命婦一品侍近二人青衣六人偏扇方扇各十六行鄣三坐鄣二白銅飾犢車駕牛馭人四從人十六夾車從車六繳一大扇一團扇二戟六十伏緣久不施用如特賜施行即合

於孟昶吉凶仗內相參排列詔並令排列祇應仍俟
導引至城外分半道至西京墳下及葬命供奉官周
貽慶押奉議軍士二指揮防護至洛陽又賜子玄喆
墳莊一區開寶四年建武軍節度使何繼筠卒詔遣
中使護葬仍賜寶劍甲冑同葬咸平元年護國軍節
度使駙馬都尉王承衍葬鹵簿鼓吹備而不作以在
太宗大祥忌禁內也元豐五年崇信軍節度使華陰
郡王宗旦薨聽以旌節牌印葬尋又詔不即隨葬者
徒二年因而行用者罪之紹興二十四年太師清河
郡王張俊葬上曰張俊極宣力與他將不同恩數務

從優厚仍賜十梁額花冠貂蟬籠巾朝服一襲水銀二百兩龍腦一百五十兩其後楊存中薨孝宗令諸寺院聲鐘仍賜水銀龍腦以歛熙寧新式先是知制誥曾布言竊以朝廷親睦九族故於死喪之際臨弔賻恤至於窀穸之具皆給於縣官又擇近臣專董其事所以深致其哀榮而盡其送終之禮近世使臣沿襲故常過取饋遺故私家之費徃徃倍於公上祥符中患其無節嘗詔有司定其數皇祐中又著之編敕令使臣所受無過五百朝臣無過三百有違之者御史奏劾伏見比歲以來不復循守其取之者不啻十倍於

著令乞取舊例裁定酌中之數以為未式詔令太常禮院詳定令布裁定以聞嘉祐七年詔大宗正自今皇親之喪五年以上未葬者不以有無尊親新喪並擇日葬之初龍圖閣直學士向傳式言故事皇親係節度使以上方許承凶營葬其卑幼喪皆隨葬之自慶曆八年後積十二年未葬者幾四百餘喪官司難於卒辦致濮王薨百日不及葬請自今兩宅遇有尊屬之喪不以官品為限而葬之下判大宗正司太常禮儀院司天監議而有是詔元祐中又詔御史臺臣僚父母無故十年不葬即依條彈奏及令吏部候限

三百八十五
卷二十一
李京
滿檢察尚有不葬父母即未得與關升磨勘如失檢察亦許彈奏

追封冊命通禮策贈貴臣守宮於主人大門外設使副位使人公服從朝堂受策載於犢車各備鹵簿至主人之門降車使者稱有制主人降階稽顙內外皆哭讀冊訖主人拜送之國朝之制有於私第冊之者有於本道冊之者私第冊之者乾德三年正衙命使冊贈孟昶尚書令追封楚王是也本道冊者建隆元年故特進檢校太師南平王高保融奉敕贈太尉端拱元年故守太師尚書令鄧王錢俶特追封秦王是

也其儀與通禮大略相類不復錄

定謚王公及職事官三品以上薨

贈官同

本家錄行狀

上尚書省考功移太常禮院議定博士撰議考功審

覆判都省集合省官叅議具上中書門下宰臣判準

始錄奏聞敕付所司即考功錄牒以未華前賜其家

省官有異議者聽具議聞蘊德丘園聲實明著雖無

官爵亦奏賜謚曰先生太平興國八年詔增周公謚

法五十五字美謚七十一字為一百字平謚七字為

二十字惡謚十七字為三十字其沈約賀琛續廣謚

盡廢後以直史館胡旦言舊制文武官臣僚皆以功

行上下各賜謚法近朝以來遂成闕典建隆以後臣僚三品以上合賜謚者百餘人望令史館編錄行狀送禮官定謚付館脩入國史詔今後並令禮官取行狀定謚送考功詳覆關送史館求為定式直集賢院王皞言謚者行之表也善行有善謚惡行有惡謚蓋聞謚知行以為勸戒六典太常博士掌王公以下擬謚皆跡其功德為之褒貶近者臣僚薨卒雖官該擬謚其家自知父祖別無善政慮定謚之際斥其繆戾皆不請謚竊惟謚法自周公以來垂為不刊之典蓋以彰善癉惡激濁揚清使其身沒之後是非較然用

為勸懲今若任其遷避則為惡者肆志而不悛乞自
今後不必候其請謚並令有司舉行如此則隱慝無
行之人有所沮勸若須行狀申乞方行擬謚考諸方
冊別無明證惟衛公叔文子卒其子成請謚臣謂春
秋之時禮壞樂闕公叔之卒有司不能明舉舊典故
至將葬始請謚於君且周制太史掌小喪賜謚小史
掌卿大夫之家賜謚請誅以此知有司之職自當舉
行明矣詔下有司詳定如皐請焉禮院更議贈安遠
軍節度使馬懷德已葬請謚乃言自古作謚皆在葬
前唐開元三品以上將葬既啓殯告贈謚於柩前無

贈者設啓奠即告謚既葬加謚出於唐時如顏杲卿
盧弈盡忠王室當時置而不議至郭知運死五十餘
年乃始請謚右司員外郎崔原以為非旌善之禮而
太常博士獨孤及謂新制死不必有謚又謂有故闕
禮追遠請謚順也及長於開元之世親聞啓奠告謚
而為新制不必有謚豈非誣哉又有故闕禮追遠請
謚皆違禮經何順之有國家給謚一用唐令然請謚
之家例供尚書省官酒食撰議官又當有所贈遺故
或闕而不請景祐四年宋綬建議今官給酒食其後
又罷贈遺自此既葬請謚者甚衆歲月浸久官闕行

跡士大夫所不能知子孫與其門生故吏志在虛美
隱惡而有司據以加謚是廢聖人之法而徇唐庸有
司之議也詔自今得謚者令葬前奏請或其家不請
則尚書太常合議定謚前葬牒史館及付其家即徇
私謚不以實論如選舉不以實法既葬請謚者不定
謚

志卷第七十七

志卷第七十五

...

...

...

...

...

...

...

...

...

...

志卷第七十八

宋史一百二十五

開府儀言上積錄國軍事前書君丞相後國史領經筵事都總裁脫等奉

勅

禮二十八 凶禮四

士庶人喪禮
服紀

士庶人喪禮開寶三年十月詔開封府禁喪葬之家
不得用道釋威儀及裝束異色人物前引太平興國
七年正月命翰林學士李昉等重定士庶喪葬制度
昉等奏議曰唐大曆七年詔喪葬之家送葬祭盤只
得於喪家及坐所置祭不得於街衢張設又長慶三

年令百姓喪葬祭奠不得以金銀錦繡為飾及陳設
音樂葬物稍涉僭越並勒毀除臣等叅詳子孫之葬
父祖卑幼之葬尊親全尚樸素即有傷孝道其所用
錦繡伏請不加禁斷其用音樂及攔街設祭身無官
而葬用方相者望嚴禁之其詔葬設祭者不在此限
又準後唐長興二年詔五品六品常叅官喪輦昇者
二十人挽歌八人明器三十事共置八牀七品常叅
官昇者十六人挽歌六人明器二十事置六牀六品
以下京官及檢校試官等昇者十二人挽歌四人明
器十五事置五牀並許設紼籠二庶人昇者八人明

器十二事置兩牀悉用香舉魂車其品官葬祖父母
父母品卑者聽以子品葬妻子者遞降一等其四品
以上依令式施行聖令御史臺街司頒行限百日率
從新制限滿違者以違禁之物給巡司為賞喪家輒
舉樂者譴伶人他不如制者但罪下里工作從之九
年詔曰訪聞喪葬之家有舉樂及令章者蓋聞隣里
之內喪不相舂苴麻之旁食未嘗飽此聖王教化之
道治世不刊之言何乃匪人親罹釁酷或則舉奠之
際歌吹為娛靈柩之前令章為戲甚傷風教實紊人
倫今後有犯此者並以不孝論預坐人等第科斷所

在官吏常加覺察如不用心並當連坐景德二年開封府言文武官亡歿諸寺擊鐘未有定制欲望自今大卿監大將軍觀察使命婦郡夫人已上即據狀聞奏許於天清開寶二寺擊鐘其聲數旋俟進止自餘悉禁從之紹興二十七年監登聞鼓院范同言今民俗有所謂火化者生則奉養之具唯恐不至死則燔爇而棄捐之何獨厚於生而薄於死乎甚者焚而置之水中識者見之動心國朝著令貧無葬地者許以係官之地安葬河東地狹人衆雖至親之喪悉皆焚棄韓琦鎮并州以官錢市田數頃給民安葬至今為

美談然則承流宣化使民不畔於禮法正守臣之職也方今火葬之慘日益熾甚事關風化理宜禁止仍飭守臣措置荒閑之地使貧民得以收葬少裨風化之美從之二十八年戶部侍郎榮彝言比因臣僚陳請禁火葬令州郡置荒閑之地使貧民得以收葬誠為善政臣聞吳越之俗葬送費廣必積累而後辦至於貧下之家送終之具唯務從簡是以從來率以火化為便相習成風勢難遽革况州縣休息之久生聚日繁所用之地必須寬廣仍附郭近便處官司以艱得之故有未行標撥者既葬埋未有處所而行火化

之禁恐非人情所安欲乞除豪富士族申嚴禁止外
貧下之民并客旅遠方之人若有死亡姑從其便候
將來州縣標撥到荒閑之地別行取旨詔依仍令諸
州依已降指揮措置標撥

服紀宋天子及諸臣服制前史皆散記諸禮中未嘗
特錄之也後史則表而出之高宗於外廷以日易月
於內廷則行三年之禮御朝則淺素淺黃孝宗又力
持三年之制皇帝未成服則素紗軟脚幘頭白羅袍
黑銀帶絲鞋成服日布梁冠

朱熹云當用十二梁

首經直領布

大袖衫

朱熹云不當用襴蓋下已有裙

布裙袴腰經竹杖白綾襯衫

或斜巾帽子視事日去杖首經小祥日改服布幘頭欄衫腰
經布袴大祥畢服素紗軟脚幘頭白羅袍素履黑銀帶禫祭
畢素紗軟脚幘頭淺色黃羅袍黑銀帶祔廟日服履黃袍紅
帶御正殿視事則阜幘頭淡黃袍黑鞋犀帶素絲鞋此中
興後制也孝宗居憂再定三年之制其服布冠直領大袖衫
布裙首經腰經竹杖小祥不易服大祥禮畢始去杖去經
禫祭畢始服素紗軟脚幘頭白袍黑銀帶祔廟畢服
阜幘頭黑鞋犀帶每遇過宮廟謁則衰經行禮二十
五月而除三年之內禁中常服布巾布衫布背子視
事則御內殿服白布幘頭白布袍黑銀帶殿設素幄

三百九十一
卷之四
每五日一次過宮則衰經而杖虞祭則布折上巾黑帶布袍受金使弔則衰經御德壽殿東廊之素幄受賀節使則御垂拱殿東楹之素幄是時宰執近臣皆不肯行惟斷自上心堅不可奪大臣乃不敢言贊其決者惟救局下僚沈清臣一人而已

臣為君服宋制有三等中書門下樞密使副尚書翰林學士節度使金吾上將軍文武二品以上布梁冠直領大袖衫布裙袴腰經竹杖或布幘頭襪衫布斜巾絹襯服文武五品以上并職事官監察御史以上內客省宣政昭宣知閣門事前殿都知押班布梁冠

直領大袖衫裙袴腰經或幞頭襪衫自餘文武百官
布幞頭襪衫腰經而已入局治事並不易服宰執奏
事去杖小祥去冠餘官奏事如之大祥素紗軟脚折
上巾黥公服白鞞錫帶禫除畢去黥服常服仍黑帶
阜鞍韉祔廟畢始純吉服宗室出則常服居則衰麻
以終制光宗居孝宗之憂趙汝愚當國始令群臣服
白涼衫阜帶治事逮終制乃止寧宗居光宗之憂復
令百官以日易月禫除畢服紫衫阜帶以治事從禮
部侍郎陳宗召請也諸路監司州軍縣鎮長吏以下
服布四脚直領布襪衫麻腰經朝晡臨三日除之內

外命婦當入臨者布裙衫帔首經絹襯衫帕首士庶於本家素服三日而除婚嫁服除外不禁文武臣僚之家至山陵祔畢乃許嫁娶仍不用花綵及樂淳熙十四年十月以將作監常璞充金國告哀使閤門舍人姜特立副之禮部太常寺言告哀使副并三節人從禮例如在大祥內合服布幘頭欄衫布袴腰經布涼繖鞍韉在禫服內合服素紗軟脚幘頭黥色公服黑鞞犀帶青繖阜鞍韉俟禫除即從吉服仍繫黑帶去魚涼繖韉並從禫制并去狨座三節人衣紫衫黑帶並不聽樂不射弓弩候過界聽使副審度隨宜改

易服用從之或遣留遺信物使同上服

喪服雜議慶曆七年侍御史吳鼎臣言武班及諸職
司人吏曾因親喪出入禁門甚有褻素紗幘頭者殊
失肅下等上之禮欲乞文武兩班除以官品起復許
褻素紗外其餘臣僚并諸職司人吏雖有親喪服未
除並須光紗加首不得更褻素紗詔送太常禮院禮
言準令文凶服不入公門其遭喪被起在朝叅處常
服各依品服惟色以淺無金玉飾在家依其服制其
被起者及朞喪以下居式假者衣冠朝集皆聽不預
今鼎臣所奏有礙令文詔依所定如遇筵宴其服淺

色素紗人更不令祇應

丁父母憂淳化五年八月詔曰孝為百行之本喪有三年之制著于典禮以厚人倫中外文武官子弟或父兄之淪亡蒙朝廷之齒叙未及卒哭已聞蒞官遽忘哀戚頗玷風教自今文武官子弟有因父亡兄歿特被叙用未經百日不得趣赴公叅御史臺專加糾察并有冒哀求仕釋服從吉者並以名聞咸平元年詔任三司館閣職事者丁憂並令持服又詔川峽廣南福建路官丁憂不得離任既受代而喪制未畢者許其終制尋令川峽官除州軍長吏奏裁餘並許解

官大中祥符九年殿中侍御史張廓言京朝官丁父
母憂者多因陳乞與免持服且忠孝恩義士所執守
一悖于禮其何能立今執事盈庭各務簡易况無金
革之事中外之官不闕不可習以為例望自後並依
典禮三年服滿得赴朝請天禧四年御史臺言文武
官併丁憂者相承服五十四月別無條例下太常禮
官議曰按禮喪服小記云父母之喪偕先葬者不虞
祔待後事其葬服斬衰注謂同月若同日死也先葬
者母也其葬服斬衰者喪之隆衰宜從重也假令父
死在前月而同月葬猶服斬衰不葬不變服也言其

葬服斬衰則虞祔各以其服矣及練祥皆然卒事反服重雜記云有父之喪如未沒喪而母死其除父之喪也服其除服卒事反喪服注云沒猶終也除服謂祥祭之服卒事既祭反喪服服後死者之服又杜預云若父母同日卒其葬先母後父皆服斬衰其虞祔先父後母各服其服卒事反服父服若父已葬而母卒則服母之服虞訖反服父之服既除練則服母之服喪可除則服父之服以除之訖則服母之服賀循云父之喪未終又遭母喪當父服應終之月皆服祥祭之服如除喪之禮卒事反母之服臣等參考典故

則是隨其先後而除之無通服五十四月之文請依
舊禮改正慶曆三年太常禮院議禮記父母之喪無
貴賤一也又曰三年之喪人道之至大也請不以文
武品秩高下並聽終喪時以武臣入流者雜難盡解
官詔自今三司副使已上非領邊寄並聽終制仍續
月奉武臣非在邊而願解官者聽凡奪情之制文臣
諫舍以上牧伯刺史以上皆卒哭後恩制起復其在
切要者不候卒哭內職遭喪但給假而已願終喪者
亦聽惟京朝幕職州縣官皆解官行服亦有特追出
者凡公除與祭景祐二年禮儀使言天聖五年太常

禮院言自來宗廟祠祭皆宰臣叅知政事行事每有服制旋復改差多致妨闕檢會唐會要貞元六年詔百官有私喪公除者聽赴宗廟之祭監祭御史以禮有總麻已上喪不得饗廟移牒吏部詰之吏部奏准禮諸侯絕周大夫絕總者所以殺旁親不敢廢大宗之祭事則總不祭者謂同宮未葬欲人吉凶不相黷也魏晉已降變而從權總已上喪服假滿即吉謂之公除凡既葬公除則無事不可故於祭無妨乞今凡有慘服既葬公除及聞哀假滿許吉服赴祭同宮未葬雖公除依前禁之詔從又王涇郊祀錄總麻已上

喪不行宗廟之祭者以明吉凶不相干也貞元吏部
奏請得許權改吉服以從宗廟之祭此一時之事非
舊典也今本院看詳律稱如有總麻已上喪遣充掌
事者答五十此唐初所定吏部起請皆援引典故奉
詔百官有私喪公除者聽赴宗廟之祭後雖王涇著
郊祀錄是一時之事非舊典也又別無詔敕改更是
以歷代止依貞元詔命施行至大中祥符中詳定官
請依郊祀錄總麻以上喪不預宗廟之祭今詳貞元
起請證據分明王涇所說別無典故望自今後有私
喪公除者聽赴宗廟之祭免致廢闕慶曆七年禮官

邵必言古之臣子未有居父母喪而輒與國家大祭者今但不許入宗廟至於南郊壇景靈宮皆許行事按唐吏部所請慘服既葬公除者謂周以下也前後相承誤以為三年之喪得吉服從祭失之甚也又據律文諸廟享有總麻以上喪不許執事祭天地社稷不禁此唐之定律者不詳經典意也王制曰喪三年不祭惟天地社稷為越紼而行事注云不敢以卑廢尊也是指王者不敢以私親之喪廢天地社稷之祭非謂臣下有父母喪而得從天子祭天地社稷也兼律文所以不禁者亦止謂總麻以上周以下故也南

郊太廟俱為吉祀奉承之意無容異禮今居父母喪不得入太廟至南郊則為愈重朝廷每因大禮侍祠之官普有露餼使居喪之人得預祠事是不欲慶澤之行有所不被柔何以小惠而傷大禮近歲兩制以上並許終喪惟於武臣尚仍舊制是亦取古之墨綬從事金革無避之義也然於郊祀吉禮則為不可下禮院議曰郊祀大禮國之重事百司聯職僅取濟集若居喪被起之官悉不與事則或有妨闕但不以慘麤之容接於祭次則亦可行請依太常新禮宗室及文武官有遭喪被起及卒哭赴朝參者遇大朝會聽

不入若緣郊廟大禮惟不入宗廟其郊壇景靈宮得
權從吉服陪位或差攝行事詔可天聖五年侍講學
士孫奭言伏見禮院及刑法司外州執守服制詞旨
俚淺如外祖卑於舅姨大功加於嫂叔顛倒謬妄難
可遽言臣於開寶正禮錄出五服年月并見行喪服
制度編附假寧令請下兩制禮院詳定翰林學士承
旨劉筠等言奭所上五服制度皆應禮經然其義簡
奧世俗不能盡通今解之以就平易若兩相為服無
所降殺舊皆言服者具載所為服之人其言周者本
避唐諱合復為期又節取假寧令附五服敕後以便

有司仍板印頒行而喪服親踈隆殺之紀始有定制矣

子為嫁母景祐二年禮官宋祁言前祠部員外郎集賢校理郭積幼孤母邊更嫁有子積無伯叔兄弟獨承郭氏之祭今邊不幸而積解官行服按五服制度敕齊衰杖朞降服之條曰父卒母嫁及出妻之子為母其左方注謂不為父後者若為父後者則為嫁母無服詔議之侍御史劉夔曰按天聖六年敕開元五服制度開寶正禮並載齊衰降服條例雖與祁言不異然假寧令諸喪斬齊三年並解官齊衰杖朞及為

人後者為其父母若庶子為後為其母亦解官申心
喪母出及嫁為父後者雖不服亦申心喪注云皆為
生已者律疏云心喪者為妾子及出妻之子合降其
服二十五月內為心喪載詳格令子為嫁母雖為父
後者不服亦當申心喪又稱居心喪者釋服從吉及
忘哀作樂冒哀求仕者並同父母正服今龍圖閣學
士王博文御史中丞杜衍嘗為出嫁母解官行喪若
使生為母子沒同路人則必虧損名教上玷孝治且
杖朞降服之制本出開元禮文逮乎天寶降敕俾終
三年然則當時已悟失禮晉袁準謂為人後猶服嫁

母據外祖異族猶廢祭行服知父後應服嫁母劉智
釋云雖為父後猶為嫁母齊衰譙周云非父所絕為
之服周可也昔孔鯉之妻為子思之母鯉卒而嫁於
衛故檀弓曰子思之母死柳若謂子思曰子聖人之
後也四方於子乎觀禮子盍慎諸子思曰吾何慎哉
喪之禮如子云子聖人之後即父後也石苞問淳于
睿為父後者不為出母服嫁母猶出母也或者以為
嫁與出不異不達禮意雖執從重之義而以廢祭見
譏君為詳正睿引子思之義為荅且言聖人之後服嫁母
明矣積之行服是不為過詔兩制御史臺禮院再議

曰按儀禮父卒繼母嫁為之服朞謂非生己者故父卒改嫁降不為己母唐上元元年敕父在為母尚許服三年今母嫁既是父終得申本服唐紹議曰為父後者為嫁母杖周不為父後者請不降服至天寶六載敕五服之紀所宜企及三年之數以報免懷其嫁母亡宜終三年又唐八坐議吉凶加減禮云凡父卒親母嫁齊衰杖期為父後者亦不服不以私親廢祭祀惟素服居堊室心喪三年免役解官母亦心服之母子無絕道也按通禮五服制度父卒母嫁及出妻之子為母及為祖後祖在為祖母雖周除仍心喪三

年侍講學士馮元言儀禮禮記正義古之正禮開寶
通禮五服年月敕國朝見行典制為父後者為出母
無服惟通禮義纂引唐天寶六年制出母嫁母並終
服三年又引劉智釋議雖為父後猶為出母嫁母齊
衰卒哭乃除蓋天寶之制言諸子為出母嫁母故云
並終服三年劉智言為父後者為出母嫁母故云猶
為齊衰卒哭乃除各有所謂固無疑也况天聖五服
年月敕父卒母嫁及出妻之子為母降杖朞則天寶
之制已不可行又但言母出及嫁為父後者雖不服
亦申心喪即不言解官若專用禮經則是全無服式

若俯同諸子杖朞又於條制相戾請凡子為父後無人可奉祭祀者依通禮義纂劉智釋議服齊衰卒哭乃除踰月乃祭仍申心喪則與儀禮禮記正義通典通禮五服年月敕為父後為出母嫁母無服之言不遠如諸子非為父後者為出母嫁母依五服年月敕降服齊衰杖朞亦解官申心喪則與通禮五服制度言雖周除仍心喪三年及刑統言出妻之子合降其服皆二十五月內為心喪其義一也郭頴應得子為父後之條緣其解官行服已過朞年難於追改後當依此施行詔自今並聽解官以申心喪

子為生母大中祥符八年樞密使王欽若言編修冊
府元龜官太常博士秘閣校理聶震丁所生母憂嫡
母尚在望特免持服禮官言按周制庶子在父之室
則為其母不禫晉解遂問蔡謨曰庶子喪所生嫡母
尚存不知制服輕重荅云士之妾子服其母與凡人
喪母同鍾陵胡澹所生母喪自有嫡兄承統而嫡母
存疑不得三年問范宣荅曰為慈母且猶三年况親
所生乎嫡母雖尊然厭降之制父所不及婦人無專
制之事豈得引父為比而屈降支子也南齊褚淵遭
庶母郭氏喪葬畢起為中軍將軍後嫡母吳郡公主

薨葬畢令攝職則震當解官行服心喪三年若特有奪情之命望不以追出為名自今顯官有類此者亦請不稱起復第遣釐職熙寧三年詔御史臺審決秀州軍事判官李定追服所生母喪御史臺言在法庶子為父後如嫡母存為所生母服總三月仍解官申心喪若不為父後為所生母持齊衰三年正服而禫今定所生仇氏亡日定未嘗請解官持心喪止以父老乞還侍養宜依禮制追服總麻而解官心喪三年時王安石比定擢為太子中允而言者俱罷免

婦為舅姑乾德三年判大理寺尹拙言按律及儀禮

喪服傳開元禮儀纂五禮精義三禮圖等書所載婦
為舅姑服周近代時俗多為重服劉岳書儀有奏請
之文禮圖刑統乃邦家之典豈可守書儀小說而為
國章邪判少卿事薛允中等言戶婚律居父母及夫
喪而嫁娶者徒三年各離之若居周喪而嫁娶者杖
一百又書儀舅姑之服斬衰三年亦準敕行用律敕
有差望加裁定右僕射魏仁浦等二十一人奏議曰
謹按禮內則云婦事舅姑如事父母則舅姑與父母
一也而古禮有暮年之說至於後唐始定三年之喪
在理為當况五服制度前代增益甚多按唐會要嫂

叔無服太宗令服小功曾祖父母舊服三月增為五月嫡子婦大功增為朞衆子婦小功增為大功父在為母服朞高宗增為三年婦為夫之姨舅無服玄宗令從夫服又增姨舅同服總麻及堂姨舅袒免至今遵行况三年之內几筵尚存豈可夫處苦塊之中婦被綺紈之飾夫婦齊體哀樂不同求之人情實傷理本况婦為夫有三年之服於舅姑止服朞年乃是尊夫而卑舅姑也况孝明皇后為昭憲太后服喪三年足以為萬世法欲望自今婦為舅姑服並如後唐之制其三年齊斬一從其夫

嫡孫承重天聖四年大理評事杜杞言祖母潁川郡君鍾歿並無服重子婦餘孤孫七人臣最居長今已服斬衰即未審解官以否禮院言按禮喪服小記曰祖父卒而後為祖母後者三年正義曰此論適孫承重之服祖父卒者謂適孫無父而為祖後祖父已卒今遭祖母喪故云為祖母後也父卒為母故三年若祖父卒時父已先亡亦為祖父三年若祖卒時父在已雖為祖朞今父歿祖母亡時已亦為祖母三年也又按令文為祖後者卒為祖母祖父歿嫡孫為祖母承重者齊衰三年並解官合依禮令寶元二年度支

判官集賢校理薛紳言祖母萬壽縣太君王氏卒是先臣所生母服紀之制罔知所適乞降條制庶知遵守詔送太常禮院詳定禮官言五服年月敕齊衰三年為祖後者祖卒則為祖母又曰齊衰不杖朞為祖父母注云父之所生庶母亦同惟為祖後者不服又按通禮義纂為祖後者父所生庶母亡合三年否記云為祖母也為後三年不言嫡庶然奉宗廟當以貴賤為差庶祖母不祔於皇姑已受重於祖當為祭主不得申於私恩若受重於父代而養為後可也又曰庶祖母合從何服禮禮無服庶祖母之文有為祖庶母

後者之服晉王廙議曰受命為後則服之無嫌婦人無子託後族人猶為之服况其子孫乎人莫敢卑其祖也且妾子父歿為母得申三年孫無由獨屈當服之也看詳五服年月敕不載持重之文於義纂即有所據今薛紳不為祖後受重於父合申三年之制史館檢討同知太常禮院王洙言五服年月敕與新定令文及通禮正文內五服制度皆聖朝典法此三處並無為父所生庶母服三年之文唯義纂者是唐世蕭嵩王仲丘等撰集非創修之書未可据以決事且所引兩條皆近世諸儒之說不出於六經臣已別狀

奏駁今薛紳為映之孫耀卿為別子始祖紳繼別之後為大宗所守至重非如次庶子等承傳其重者也不可輒服父所生庶母三年之喪以廢始祖之祭也臣謹按禮經所謂重者皆承後之文據義纂稱重於父亦有二說一者嫡長子自為正體受重可知二者或嫡長亡取嫡或庶次承傳父重亦名為受重也若繼別子之後自為大宗所承至重不得更遠係庶祖母為之服三年惟其父以生己之故為之三年可也詳義纂所謂受重於父者指嫡長子亡次子承傳父重者也但其文不同耳詔太常禮院與御史臺詳定

聞奏衆官叅詳耀卿王氏子紳王氏孫尤親於慈母
庶母祖母庶祖母也耀卿旣亡紳受重代養當服之
也又薛紳頃因籍田覃息乞將叙封母氏恩澤迴授
與故父所生母王氏其薛紳官爵未合叙封祖母蓋
朝廷以耀卿已亡紳是長孫敦以孝道特許封邑豈
可王氏生則輒邀國恩歿則不受重服况紳被王氏
鞠育之恩體尊義重合令解官持齊衰三年之服詔
從之皇祐元年大理評事石祖仁奏叔從簡為祖父
中立服後四十日亡乞下禮院定承祖父重服禮官
宋敏求議曰自開元禮以前嫡孫卒則次孫承重况

從簡為中子已卒而祖仁為嫡孫乎古者重嫡正貴所傳其為後者皆服三年以主虞練祥禫之祭且三年之喪必以日月之久而服之者有變也今中立未及卒哭從簡已卒是日月未久而服未經變也或謂已服朞不當改服斬而更為重制按儀禮子嫁反在父之室為父三年鄭氏注謂遭喪而出者始服齊衰朞出而虞則以三年之喪是服可再制明矣今祖仁宜解官因其葬而制斬衰三年後有如其類而已葬者用再喪制服遂著為定式熙寧八年禮院請為祖承重者依封爵令立嫡孫以次立嫡子同母弟無母

第立庶子無庶子立嫡孫同母弟如又無之即立庶
長孫行斬衰服於是禮房詳定古者封建國邑而立
宗子故周禮適子死雖有諸子猶令嫡孫傳重所以
一本統明尊尊之義也至於商禮則嫡子死立衆子
然後立孫今既不立宗子又未嘗封建國邑則嫡孫
喪祖不宜純用周禮若嫡子死無衆子然後嫡孫承
重即嫡孫傳襲封爵者雖有衆子猶承重時知廬州
孫覺以嫡孫解官持祖母服覺叔父在有司以新令
乃改知潤州元豐三年太常丞劉次莊請祖母亡有
嫡曾孫次莊為嫡孫同母弟在法未有庶孫承重之

文詔下禮官立法自今承重者嫡子死無諸子即嫡
孫承重無嫡孫嫡孫同母弟承重無母弟庶孫長者
承重曾孫以下準此其傳襲封爵自依禮令
雜議大中祥符八年廣平公德彛聘王顯孫女將大
歸而德彛卒疑其禮制禮官言按禮曾子問曰娶女
有吉日而女死如之何孔子曰壻齊衰而弔既葬而
除之夫死亦如之注云謂無朞三年之恩也女服斬
衰又刑統云依禮有三月廟見有未廟見就婚等三
種之文妻並同夫法其有克吉日及定婚夫等惟不
得遠約改嫁自餘相犯並同凡人今詳女合服斬衰

於室既葬而除或未葬但出攢即除之天聖七年興
化軍進士陳可言臣昨與本軍進士黃價同保臣預
解送之後本軍言黃價昨赴舉時有叔為僧喪服未
滿臣例當駁放竊思出家制服禮律俱無明文况僧
犯大罪並無緣坐犯事還俗準敕不得均分父母田
園又釋門儀式見父母不拜居父母喪不經死則法
門弟子為之制服其於本族並無服式望下禮官詳
議許其赴試太常禮院言檢會敕文暮周尊長服不
得取應又禮為叔父齊衰暮外繼者降服大功九月
其黃價為叔僧合比外繼降服大功皇祐四年吉州

司理叅軍祝紳幼孤鞠於元嫂已嘗為嫂持服元喪
又請解官持喪有司以為言仁宗曰近世盖有匿親
喪而干進者紳雖所服非禮然不忘鞠養恩亦可勸
也候服闋日與幕職知縣

繼絕熙寧二年同修起居注直史館蔡延慶父褒故
太尉齊之弟也齊初無子子延慶後齊有子而褒絕
請復本宗禮官以請許之紹聖元年尚書省言元祐
南郊赦文戶絕之家近親不為立繼者官為施行今
戶絕家許近親尊長命繼已有著令即不當官為施
行四年右武衛大將軍克務乞故登州防禦使東牟

侯克端子叔博為嗣請赴期朝參起居而不為克端服大宗正司以聞下禮官議宜終喪三年遂詔宗室居父母喪者毋得乞為繼嗣大觀四年詔曰孔子謂興滅繼絕天下之民歸心王安石子雱無嗣有族子棣已嘗用安石孫恩例官可以棣為雱後以稱朕善善之意先是元豐國子博士孟開請以姪孫宗顏為孫據晉侍中荀顛無子以兄之孫為孫其後王彥林請以弟彥通為叔母宋繼絕孫詔皆如所請淳熙四年十月二十七日戶部言知蜀州吳擴申明乞自今養同宗昭穆相當之子夫死之後不許其妻非理遣

還若所養子破蕩家產不能侍養實有顯過即聽所
養母愬官近親尊長證驗得實依條遣還仍公共繼
嗣

志卷第七十八